

瀋

陽

縣

志

潘陽縣志卷之九

人物

名宦

鄉型

流寓

孝子

列女

氏族

112412

114511

天淵

廣文

筆千

滿寓

濼壘

谷宿

人博

香園志卷之六

瀋陽縣志卷之九

人物

待文而興是曰凡民英豪翼運垂世軼倫亦有忠貞綱維名教草澤沈淪潛光弗曜  
天挺清節秩茲民彝廉頑敦薄坊表克資彰闡顯幽網羅沈滯考信徵實光垂奕世

述人物

名宦

談廣慶字雲浦先世駐防廣州隸鑲白旗漢軍籍以繙譯進士改知縣揀發奉天歷官奉天  
府治中開原承德廣寧新民寧遠金州各廳縣清操惠政三十年如一日而憐才若渴折獄  
如神士民識與不識咸稱爲談青天云將軍慶裕奏稱治行第一光緒甲午官金州廳同知  
日軍壓境號稱數萬廣慶率所屬捕盜營兵二十名登城守禦旋爲流彈所中遂昏暈墜城

兵士感其義負之驅輶轉出險廣慶甦語左右曰非我志也衆皆泣下事定後長吏以聞得減等坐軍台子國楫時方以庶吉士供職詞垣伏闕上書願代父荷戈朝廷鑒其誠特旨赦免故事無請代例異數也廣慶性端嚴慈惠汲引後進如不及官治中時某知名士因誣陷被累廣慶力予平反始獲免卒爲有清名臣人服其有人倫鑒子國楫國桓同登科第繼廣慶宦奉廉能有父風錢塘張錫鑾將軍至以眉山父子擬之其爲人所敬重如此廣慶善書爲政績所掩吉光片羽人爭寶之

崇實字樸山完顏氏正白旗滿洲人金世宗之裔累官盛京將軍奉天總督有德政卒後民建三賢祠與文忠公文祥清愨公都興阿合祀之事蹟詳見清史本傳

都興阿字直夫廂黃旗滿洲人累官盛京將軍服官清介有包孝肅海剛峯之風卒後民建三賢祠與文勤公崇實文忠公文祥合祀之事蹟詳見清史本傳

左寶貴字冠廷山東費縣人先世爲天方教徒性勇敢多大略幼時與里中羣兒戲輒樹竿  
運石築爲營壘分兩隊已則建大將旗鼓號令之坐作進退皆闇合兵法觀者異之弱冠時  
值洪楊發難山左淪陷寶貴遂入尺籍轉戰楚豫各省以功授固關守備旋擢天津遊擊駐  
防古北口德宗御極奉天將軍文勤公崇實以征剿馬賊宋三好奏調來奉寶貴所至肅清  
遂留奉治軍務二年招募奉字軍以寶貴爲翼長尋擢總兵復募貴字營並靖邊各隊自是  
奉省始有重兵寶貴在軍中與兵勇同甘苦部下有受傷戰沒者皆以私財參其家屬故歷  
剿著名悍賊所向有功積賊趙西來精馬術善用槍射擊無虛發賊黨號曰神槍先後兵弁  
剿捕者率亡其愾下由是橫行邊內外人不敢近寶貴弟 奉櫟搜捕圍之數匝兵弁無  
敢先入者 怒凝視搏之趙舉槍呼擊其冠冠落不少退又呼取馬槍鳴馬立斃 愈  
怒仍易騎以進遂喪元兵士驚却趙從容逸去寶貴大怒嚴限櫟捕卒獲之餘黨皆潰散十

四年秋大水萬泉河溢附郭東南盡爲澤國寶貴督率所部救飢拯溺倡賑助捐災黎全活無算甲午日韓事起寶貴奉檄進師平壤時日人先據要隘築壘設伏寶貴軍後至地利已失無可守不得已乃入城城外設犄角者有葉志超豐陞阿各軍見日兵勢盛皆棄營走復要寶貴回遁寶貴怒罵曰若輩惜死可自去此城爲吾塚矣日人既襲破城外餘兵乃悉全師圍攻之晝夜城上下彈箠落如雨雹會城中火藥乏糧復盡寶貴手斬逃兵二十餘由是衆皆死守無二心先是寶貴每臨敵輒衣士卒衣身先犯陣至是乃衣御賜衣冠登陴督戰日人素憚其威名知寶貴不死平壤不可得募能擊之者萬金賞有韓人應募旦夕伺之一日戰方酣見城上有衣黃馬褂珊瑚冠者往來睥睨指揮知必寶貴乃蛇行匍匐抵城下狙擊之遂被害是日寶貴督戰手發榴彈巨炮三十六彈至末彈炮鳴寶貴忽仆將士趨視之已洞脰矣事聞予諡忠壯優恤如制寶貴治軍嚴肅重文士愛材勇有奇技異能者輒羅

致之麾下功不吝賞罪不私刑士樂爲用將軍雖好武乎然性慈善於地方公益尤惓惓先  
後設立賑災粥廠同善堂棲流所育嬰堂縣治四境津梁道路多寶貴捐廉葺修沒後士民  
思其遺愛建祠祀之春秋致祭不衰

鄉型

范鏞字平甫明瀋陽衛人嘉靖中進士任河南府知府時歲奇歉鏞籌金發粟邑無流亡民  
賴全活闔境頌神君焉累遷寧夏巡撫振興池廢邊境肅清見舊志

范文程字憲斗宋文正公仲淹之後少沈毅讀書多大略初爲諸生居瀋陽清天命三年杖  
策謁太祖於撫順偉其貌與語大悅之詢知家世謂諸貝勒曰此名臣後也厚遇之命值宏  
文館叅預帷幄每議大政多所籌畫天聰三年太宗征明入大安口下遵化進薄燕京明年  
還軍克永平瀋州諸城五年徇大凌河城諭降明將祖大壽六年秘疏陳進取七年援明降



將孔有德等來歸先後以計誅明總兵毛文龍經略袁崇煥明社遂屋卒佐清成帝業皆文  
程策也是時初設都統廷議首推文程太宗曰此一軍職耳朕方資范章京爲心膂其別議  
之尋以文程爲祕書院大學士值樞密總機務詔諭皆出其手每入對必漏下逾數十刻始  
出或未及食息復奉召以爲常順治元年三月流賊李自成陷燕京明帝崩於煤山四月吳  
三桂來乞師上召文程於溫泉決進兵策文程力疾趨朝建議曰自闖賊猖狂中原糜爛弑  
君盜國生靈塗炭此必討之賊也雖擁衆百萬似難爭鋒然其敗道有三逼戕其君天怒矣  
戮辱搢紳士憤矣淫掠不休民恨矣備此三敗行之以驕可一戰破也國家兵以義動奉天  
討逆恤其卿士拯其黎元巨凶授首大業可成號令天下孰敢不從千載一時機不可失又  
言好生者天地之德也兵者聖人不得已而用之自古未有嗜殺人而得天下者今欲統一  
區夏非順天心戒嗜殺不可於是大軍遂發文程扶疾隨征申嚴約束殺人者抵罪軍紀肅

然入關時民多逃匿文程草檄宣諭義兵之來爲爾民子復君父仇所誅者惟闖賊非敵百姓也官民來歸者悉復其業於是流亡始稍稍集民心遂安五月朔收京闖賊西遁文程首建議爲明帝發喪易梓宮備儀衛上諭號並爲文紀其事十月朔世祖定鼎文程疏請撫遺黎訂冊籍盡除明季重賦廠衛諸苛政當時國體新造未集百廢待舉文程嘗晝夜在闕下經營草昧贊襄密勿事無鉅細應機立辦有清一代開國規制多其所手訂者中原既定請申行鄉會試以致人材國用不足請興屯田又上保舉連坐法詔皆立予施行先後累以功晉一等子世爵賜號巴克什歷議政大臣纂修太宗實錄總裁晉太傅兼太子太師以疾乞休優詔許暫解職調攝上親調藥餌遣中使馳賜之十四年詔畫工就第圖其像藏於內府康熙九年卒聖祖震悼輟朝二日賜祭葬有加禮予諡文肅御製碑文勒墓五十二年御書元輔高風額其門子四長承斌襲一等子爵次承謨另有傳三承勳兵部尙書四承烈累官

戶部侍郎承謨子時崇兵書尙書承勳子時繹工部尙書又有時紀時綬時捷並爲名臣時綬子宜恆歷官副都統乾隆五十七年奉旨范文程在國初時勳庸懋著其子承謨又靖節捐軀今其子孫內無文職大員殊堪軫念范宜恆著加恩授爲工部侍郎嘉慶元年擢戶部尙書尋卒

范承謨字覲公文肅公仲子也初官侍衛順治九年中進士選庶吉士授宏文館編修康熙七年巡撫浙江故事督撫受印後例劾不法吏兩司列狀請承謨閱而哂曰是欲吾舍豺狼而問狐狸也遲之一日出片紙盡列兩浙豪惡姓名及墨吏之尤者劾繫置之法聞者皆悚息浙東西大治九年杭嘉湖水災承謨奏貸藩庫銀八萬兩糴米湖廣以平糶應徵漕米分別蠲緩奏豁寧台金衢溫處諸府荒田三十萬畝十年以疾請解任百姓攀轅泣留總督劉兆麒提督塞白理據民詞一百五十餘紙合疏籲請留任台臣姜希轍柯聳何元英亦言其

愛民如子劾貪除猾杜絕請託單騎勘荒悉心賑恤浙人愛戴深於飢渴請順民情留原任  
在浙四載民安其治每出巡山農進瓜果脫粟飯受食之日與父老童穉接以故悉民疾苦  
得設施拯卹十一年擢閩督承謨以海疆重任難副具疏辭弗允請陞見許之明年入覲召  
對解御衣冠服及鞍馬賜之初閩督駐漳州至是將撤靖南藩屬還京特命駐福州賜蒙古  
勇士八十餘人從行甫抵任聞吳三桂反承謨察耿精忠有異志綜計督標兵少又與耿藩  
所部習不足恃乃疏請增兵復舊制又請巡海嶠赴漳閱泉鎮兵以遙制之疏上未及行客  
或謂承謨曰滇氛以及楚矣盍以備鄰封爲辭出據其上流乎此王文成之所以擒宸濠也  
承謨曰彼逆猶未發也我動彼且得間謂我據地陰圖之因以怒其下是我失守而激變不  
可爲也乃密檄諸邑將以謁新總督爲名各率健兒赴行省用折逆謀事未集而精忠叛伴  
言海寇至邀與計事巡撫劉秉政陰附精忠促之行承謨知有變左右請擐甲以從承謨曰

衆寡不敵備無益也乃坦然按轡往至則逆衆蜂屯露刃承謨挺身前罵賊精忠素憚其威望恐殺之重民怒乃繫而閉諸土室置守者三十二人承謨絕粒八日不死精忠遺秉政說降秉政指且進承謨奮足蹴之仆地罵曰逆賊天誅不遠吾先禱爾魄在械繫三載冠御賜冠衣辭母時衣蟣蝨滿身未嘗易旬朔望奉時憲書一帙北面再拜間爲詩文以桴炭畫壁上當被執時部曲有張福建者手雙刃奮呼奪門將衛承謨出連斃數十人力竭而死蒙古人嘛呢精忠所置守者三十二人之一也感承謨忠義謀縱之出走事洩爲精忠所磔十五年九月克仙霞關精忠將降冀飾辭免死懼承謨暴其罪遂遇害時夜半賊以繩至承謨從容起索冠賊奪擲其冠承謨大怒乃以械拑擲冠者頭立斃尋整衣望闕九頓首就縊幕客無錫稽永仁會稽王龍光華亭沈天成從弟承譜及家屬從死者五十四人舊役王道隆以奉使還至延平聞變自焚死賊焚承謨尸棄之野秦竈騎兵許鼎乘夜負承謨燼骸藏之明

年概還京上震悼輟朝二日贈兵部尙書加太子少保廕一子賜祭葬予諡忠貞御書碑文  
賜其家十九年精忠被俘赴市時承謨子時崇手礫其肉以祭奠閩人頌建專祠於道山御  
書祠額曰忠貞炳日生平所著有吾庸稿浙閩奏議百苦吟書壁集聖祖親製序文有曰浩  
然之氣流行充溢土塊灰丸同於利劍禿毫斷梗等比霜矛寫忠孝之性靈奪奸凶之殘魄  
大哉王言文信國後惟承謨足以當之云

佟國器字滙白奉天瀋陽人順治二年任嘉湖兵備道值兵燹之後國器相機剿撫招集流  
亡所至有聲擢浙江按察使時浙東初定逆案株連甚衆國器平情訊鞫釋枉矜疑平反全  
活者無算十二年巡按南贛平梅窖坑劇賊曾拱辰黃鄉賊楊興及大帽山自扇坑諸盜由  
是江粵閩楚間積賊畧盡旋調任浙江巡撫招降僞都督廖明旗之衆剿滅海寇阮六等海  
疆寧謐去後士民建祠祀之

陳錦字天章奉天瀋陽人順治初任閩浙總督延平將軍寨地形險要寇踞其巔俯瞰順永  
蔣沙四邑窺伺省垣錦統衆填土高與寨齊乘以登遂奪其壘適漳平圍急錦提兵赴援師  
次同安爲刺客所害

徐來麟奉天瀋陽人順治五年知平陽府時賊黨姜逆攻平陽來麟禦却之已而延安劇賊  
王老虎應逆渡河陷汾州復攻平陽來麟與巡道王無黨參將范永宗固守時出銳師擊之  
擒賊悍將劉文明賊黨爲之奪氣會援軍至賊解圍遁來麟追斬賊首劉四亨於谷口村餘  
賊悉平嗣復招降山寇八百餘請豁荒糧數千石山右士民建祠祀之

李率泰字壽疇奉天瀋陽人有方略善用兵由勳衛累官侍郎歷任封圻定三吳下閩越率  
泰之功最多滇粵之役破李定國收復高雷諸州遷兩廣總督尋移督閩浙攻取舟山羣島

克閩安鎮招降海寇鄭鳴俊陳輝之衆康熙二年進剿台陽拔金門廈門諸島後官至兵部

尙書謚忠襄

李棲鳳字瑞梧奉天瀋陽人爲諸生時卽以天下爲己任由內院副理事官歷官東昌荊南道湖廣右轄巡撫安徽所至有聲順治八年以僉都御史撫粵與平南靖南兩藩先定南詔二郡乘勝遂平廣州棲鳳治粵八載杜請託絕苞苴省刑薄斂粵民賴之十四年加兵部尙書十五年代李率秦總督兩廣先後討平積年巨盜各烏蠻土司於是交趾諸郡悉讐服歸貢棲鳳之功居多十七年加太子少保旋予告歸卒於家粵人思其遺愛祀之名宦祠

石珍字璜公滿洲人鎮海大將軍廷桂之子廷桂順治年間駐師鎮江性慈善治軍嚴肅能愛民有石佛之號珍以蔭歷官江鎮道廉靜慈惠與民休息革弊興利不憚勞瘁卒於官士民哀輓積詩數百章共捐貲建祠祀之

麻勒吉奉天瀋陽人順治壬辰科第一人及第康熙十年總督兩江甫蒞任蝗蝻爲災遍境



內麻勒吉督率所屬仿古埋蝗之法行之是歲大有秋蝗不爲害歷官數省凡利弊所在莫不振刷有便民者上奏後卽著爲令甲小廉大法皆有規矩可守內擢後士民錄其政績尤要者三十八條勒去思碑紀之於雨花木末山下以表遺愛及卒復於學宮前聚寶門外各建祠祀之至今弗衰

李如桂奉天瀋陽人順治十年由舉人知紫陽縣時兵燹初過民生彫敝邑治荒殘如桂撫綏遺黎屯懇築城修學養士百廢畢舉後以僉事提學兩浙振起文風獎掖寒畯得士頗盛儒林循吏斯爲稱首

宋賢都奉天瀋陽縣人清順治五年知山東城武縣悍賊李化鯨變起賢都猝不及備詒以甘言怠其謀化鯨遂攻曹縣賢都募死士夜薄其營化鯨覺還兵攻城武賢都力戰死閤門二十八人皆殉節邑人建祠祀之

徐大用字器之奉天瀋陽縣人初任山東萊州守清廉愛民秩滿以叅議道分守留原任順治十年膠州總兵官海時行素驕蹇奉調南征不行嗾兵爲逆逼大用同入海不從遇害州人建憫忠祠祀之

李文學奉天瀋陽縣人順治六年由貢生知山東定陶時李化鯨餘黨邢可觀猶負固榆園文學蒞任甫三月遇賊於白塔坡挺身與戰被數創死之

劉登科奉天瀋陽人順治十三年由監生知黃巖縣十四年海寇陷城脅降不從遂縛之投江中士民哀之立祠祀焉

甘文焜舊志云鑲藍旗人滿漢名臣傳云其先江西豐城人後移瀋陽由筆政累遷禮部啟心郎聖祖御極改大理少卿六年授直隸巡撫先是右都御史郝惟訥以督撫親蒞屬邑官吏因緣派累民間奏罷巡視例文焜疏言巡撫不巡視屬邑則吏治民隱無由悉知如巡撫

不賢圖潤私家雖坐守一城而苛屬擾民之事正多若果賢必自愛名節減省從役絲毫不以累人而年歲豐歉民間利病有司貪廉悉無遁情請仍勅令巡視但申嚴苛擾禁例則不肖者知儆而實心任事者得盡職守疏下部議部臣執郝惟訥前奏寢其事上曰各省遇有水旱等災督撫減省從役速行履勘庶不至顛倒輕重且可察訪貪官蠹役重加懲治於苦累兵民之事驗時卽行更改其議允文焜請著爲令九月文焜疏報履勘涿霸安祁等州縣田地數萬頃秋雨爲災請全蠲歲賦已徵夏稅流抵來年得旨報可旋擢雲貴總督時吳三桂鎮雲南總督駐貴陽三桂欲藉邊燹以固兵權詭報土蕃康東入寇又陰趣凱里諸苗煽亂羽檄交馳以覘文焜措置文焜料康東無能爲而凱里近在肘腋不制恐滋蔓難圖先督兵進剿擒斬無算連破賊巢陣斬賊酋阿戎餘黨悉平乃以進剿康東師期移檄雲南而三桂果以康東遠遁來告文焜尋以滇疆遼闊疏請巡視因遍歷各府州縣七月以疾求罷溫

旨慰留九月丁母憂命在任守制十一月臻剖苗人阿福倡亂文焜遣兵搗其寨陣斬千餘人擒阿福誅之文焜再疏乞歸葬許給假治喪十二年十月還貴陽任事時方允三桂撤藩之請三桂期以十一月二十四日起行陰結黨羽謀反先期三日戕巡撫朱國治分遣逆黨逼貴陽文焜聞變即繕疏遣族弟文炯賚馳入告復致書川湘總督蔡毓榮趣其集兵杭州聯絡楚黔聲援初文焜回京治喪三桂請以雲南巡撫署理總督印因假訓練爲名盡調督標弁兵赴滇厚結之至是煽誘潰散莫聽文焜調遣文焜旣牒提督李本深扼盤江上流以拒賊適本深以書來覘文焜意中多遁辭文焜復爲手書答之略曰黔省安危責在提督逆賊受國厚恩罔思圖報乃弄兵一隅自取滅亡我輩忠孝自矢建樹正在今日萬一不濟惟有效張許南雷以身殉國斷不稍存携貳本深得書弗顧竟据安順府從逆貴州巡撫曹申吉亦降賊文焜見城中將吏無一可與謀者度貴陽不能守惟鎮遠地勢險阻外可號召荆

楚之兵內可抗扼滇黔之隘因令妾盛氏率婦女七人自經死卽輕騎馳赴鎮遠至則守將江義亦已從逆文焜至吉祥寺江義以兵環之文焜歎曰封疆大臣當以一死報國乃整衣冠望闕再拜遂自刎死年四十有二四子國城及筆政和善雅圖從死焉後吳逆平貴撫楊雍建疏陳文焜滇黔政績及死節事得旨下所司優恤並允直隸巡撫于成龍請遺其長子宣化府同知國均迎櫬還京至日遣大臣迎奠於蘆溝橋贈兵部尙書賜祭葬如例予諡忠果廕一子國璧入監二十五年貴州巡撫閻興邦以士民請建專祠於貴州入奏御書勁節二字額其祠世宗時入祀昭忠祠

張朝珍字玉笥漢軍正藍旗人任湖北巡撫時滇黔用兵軍至旁午援兵籌餉不擾民不苛派製造戰艦興練水師通楚蜀之路爲諸軍後勁皆朝珍一身任之嗣歲歉捐賑救飢全活無算以勞瘁卒於官讀史者尙論治楚之績後來惟胡文忠公可以媲美非虛譽也

王國光奉天瀋陽人以世職歷任侍郎改都統清廉剛果時盜風甚熾良莠雜居國光定連坐保甲承審之法羣盜戢迹夜不閉戶居民頌之康熙六年海蘇利叛加國光鎮海大將軍率師討平之人擬其功於韓范云

于成龍字振甲奉天瀋陽人世隸鑲紅旗漢軍康熙七年由廕生知樂亭縣首歲苛派剔除陋規持清廉撫民如子賑飢興學禮賢愛士政通事舉邑中大治十年以署濠篆註謾吏民籲閭請留復任十八年移授北通州知州以于瑞荐遷江寧知府旋擢按察使二十四年巡撫直隸所至政聲稱最士民戴之如父母所荐彭鵬邵嗣堯後皆爲名臣世以成龍有知人之明其生平事蹟具詳清史本傳

王鑄鼎字象九奉天瀋陽人康熙十三年由國子生任臨海令時盜寇充斥剿師雲集鑄鼎親冒矢石辦餉築屯有防禦功寇退設賑籲蠲民賴蘇息又立催科之法止查花戶完欠除

去現年圖差以積勞卒於官

費揚古正白旗滿洲人十五歲襲三等伯康熙十四年征漠克長沙有功後以內大臣撫遠將軍兼攝右衛建威將軍康熙三十五年統滿漢兵出殺虎口與大同總兵康調元殺虎口協鎮王元登天山涉瀚海直抵招莫多地方征厄魯特噶爾丹噶會窮蹙仰藥死大敗賊兵遂定其地以功晉一等公奏設歸化城鎮撫邊徼功最著卒謚襄莊今歸化城爲建專祠奉若神明

張仲德奉天瀋陽人康熙十七年任廣東藩司明決幹濟時南詔二郡盜起軍興旁午仲德運籌有方凡所輸將上不虧賦下不病民盜平招流亡興屯墾地方諸弊盡革之粵俗輕生多服毒草奸徒藉爲奇貨仲德嚴禁之刁風乃寢後卒於官祀廣東名宦祠

魏萬侯奉天瀋陽人康熙甲寅武進士任浙江溫鎮左營游擊閩寇犯瑞安萬侯率師援剿

至湖北嶺擒斬甚衆以後軍不繼退保慈湖既而賊大集勢不支遂力戰死長子棟亦隨陣歿賊平後萬侯贈副將棟贈國子監助教

段應舉鑲黃旗漢軍人康熙十五年提督福建軍務收復全閩時誓師戒殺軍紀嚴肅無秋毫犯尚兵民德之後寇圍海澄城中食盡兵民無一叛者城陷應舉殉節邑人建祠祀之

王之鼎字公定奉天瀋陽人康熙十九年以定海將軍提督四川軍務恢復全蜀進師援永安九偽將軍聯兵圍之數匝三月糧盡援絕士氣愈厲猶遣騎挑戰輒斬獲賊穴地道以火藥轟城城崩陷于劍自刎不殊被執昇之貴陽賊黨百計脅降終不屈遂遇害事聞予諡忠毅贈少保民間建祠祀之

陳收泰字大來舊志云鑲紅旗人貢生康熙三年任閩巡海道搏擊豪強奸宄歛迹耿藩謀逆僞檄南下啟泰密與海澄公黃梧謀拒守會梧病事不可支啟泰令其妻劉氏及妾婢幼



女先就縊啟泰遂朝服再拜自經死其子女器未隨任及聞遇害赴漳迎櫬值海寇鄭錦犯順刦之去越二年乘間脫歸上以其父子忠義加贈啟泰工部侍郎予諡忠毅入祀九忠祠啟泰有幕客李鑑字倫表紀綱僕范某於啟泰就義後力調護其遺孤故得無恙湖上李笠翁漁曾著義士傳以表揚之按陳公本遼東蓋州衛人但已列舊志今仍之其生平遺事甚多詳見滿漢名臣傳各書

夏文耀字助旗奉天瀋陽人乾隆乙未科武進士以御前侍衛歷官兩廣督標參將文耀性果毅善將兵絕甘分少均勞逸嚴紀律一時論之者謂合程李爲一人云

昇寅字賓旭號晉齋馬佳氏鑲黃旗滿洲人少孤年十七補博士弟子員乾隆己酉拔貢故事選拔朝考例於貢院扁試會是科有人奏言各省選拔多不公上命大臣監試取中後在正大光明殿覆試如進士例上御殿親試欽取昇寅第一授小京官分禮部嘉慶元年授額

外主事三年隨禮臣奉使盛京送玉牒途次寧遠有僕需索公館昇寅知之立交地方有司重責遞籍由是差役肅然無敢滋事者五年復應制科舉於鄉六年題補儀制司八年開館修大清會典時河間紀文達公昫爲總裁舉昇寅爲纂修司清書繙繹尋充提調十四年授浙江道監察御史疏請整飭學校以正蒙養疏上嘉納十八年擢翰林院侍講學士尋轉補侍讀學士六月奉使喀爾喀扎薩克圖汗愛滿致祭郡王銜多羅貝勒成都扎普以馬駝貂皮爲贈昇寅却之二十一年簡都察院左副都御史每奏事召問控案昇寅奏對詳慎稱旨上曰朕將用爾任盛京矣五月授盛京禮部侍郎謝恩召見上曰有人說盛京人不宜爲盛京官試問盛京大臣俱是八旗滿漢何一非盛京人耶且在京諸旗員又何一非在京八旗人耶昇寅抵任後以盛京部屬壯丁差役苦累至道光元年祭品復有增加遂疏請調劑丁差得旨依議尋調盛京刑部昇寅性慈祥素不喜刑名之學至是究心律例遺案綜覈多所

平反五年遷京工部右侍郎旋改刑部六年外擢熱河都統八年署寧夏將軍九年調任成都十年補授綏遠城將軍十一年內擢都察院左都御史兼鑲紅旗漢軍都統並署工部尚書十四年奉使桂粵授禮部尚書歸至陽朔以疾卒年七十三贈太子太保予謚勤直昇寅以部曹起家歟歷中外持躬清介所至政簡民孚務以德化人歷奉使命查辦秦隴魯豫湘粵諸案宅心仁恕無枉無縱於善類尤多所保全子二寶珣寶琳皆有聲於時寶珣後官至

盛京戶部侍郎孫紹祺官理藩院尚書紹誠官河南布政使紹彝官民政部參議紹英官度支部侍郎

王朝幹字翰屏號東圃奉天瀋陽縣人先世居直隸之保坻自曾祖之泰始遷奉天後遂家焉父沛以孝聞朝幹少穎異弱冠補諸生年二十八中式嘉慶戊午科順天鄉試已而考充盛京宗學漢教習期滿以知縣分發廣東尋以親老改近遂發山東嘉慶辛未試署高密值

歲饑朝幹捐廉勸賑得穀數千斛擇城中大寺儲之先稽戶口編保甲以邑紳分司其事而躬督之無侵無漏凡三閱月活者無算癸酉署邱縣有水災前令未及以時報迨朝幹至已逾格乃力請於上憲卒得緩征且予賑丙子署鉅野鉅野故盜藪朝幹抵任歲餘獲盜百數十境內肅清戊寅補單縣蒞任五日以憂去庚辰服闋復補原任朝幹宰單三年政聲大著癸未權知濟寧其地水陸輻輳民習浮末朝幹嚴爲條教局博者聚飲者飾子女爲奇邪者皆斂迹有作匿名帖誣回民某以盜者朝幹謂是於法不當問寢之會朝幹以事赴省投帖者復聞於河帥河帥見之遽飭標弁督兵圍捕命州佐同河員會鞫欲加刑求朝幹適旋署提訊數語立出之而河帥入標弁言謂朝幹姑縱朝幹不顧細訊某與族人子夙有嫌卽河帥門卒也逮其人至命之書與前帖述州符一訊而服案旣白入謁河帥帥亦悔由是益深器之又嘗有夜擊堂鼓者謂其弟被殺於某朝幹詢其里居遽命笞之曰汝弟不死何誣也

已而果如所言或叩其故朝幹曰吾御里保以威信百里內命案無不先聞者其里長今日  
以事來未聞其弟以昨死且其詞遁而不哀故逆折以省拘問耳丁亥守濟南聞商河多盜  
吏不能得訪其鄉有黃汪莊三百家比屋而居戶中通若蜂房然真盜藪也亟請於方伯賀  
方齡奏毀其廬析其人民乃得安堵朝幹遇事有定見不爲人低昂初至山左在獄局有縣  
令某以酷刑斃十餘命法當受過或欲爲緩頰朝幹持不可又嘗以案情與上官爭或示以  
詞色卒不爲少屈戊子丁內艱回籍壬辰服闋復任濟南癸巳以積勞卒於官士民思其德  
教建祠祀之

陳克讓奉天瀋陽縣人先世居福建晉江清初避耿藩之難始移家遼東性聰穎讀書過目  
不忘幼時嘗於家庭說史漢爲老人解頤偶及伏波馬革還屍語老人有問彼何樂此克讓  
曰忠臣爲國捐軀名垂青史夫何不樂克讓父聞之歎曰是兒終當以節義顯年十九補博

士弟子員以優行貢成均道光三年聯捷成進士以主事觀政吏部隸考功司案山積多矛盾吏得上下手同曹患之克讓請任勘校原始要終必期畫一積半歲寒暑不少息司有疑案不能決克讓檢某牘證之不爽因共推爲主稿由是吏無敢欺者十四年擢本司員外郎乙未丙申春秋闈兩充考官所識拔多名下士十七年京察一等遷郎中任戶部糧廳總八省漕運兼銅稅夙有膏腴名視事初胥吏持萬金壽且曰舊規也克讓曰餌耳何規爲擲不受屈驗漕則克讓躬歷諸舟檢視不少留難終事漕員頌神明二十年外簡四川綏定府知府過陝李文恭公星沅時爲廉訪造厲謂克讓曰天下官安得盡如君者咨歎久之克讓與星沅初不識面聞其至頗以爲訝蓋李嘗附糧艘赴京得之漕員所述故願定交焉綏定在萬山中遭王三槐之亂未盡復業克讓乃除煩苛禁貪殘與民休息務以寬簡爲治暇則選士民子弟俊秀者親課之捐廉俸助膏火郡內翕然號慈父大竹巨盜宋帽頂趨捷凶悍

能緣屋壁飛走如平地嘗殺人逸克讓偵得其處檄屬密緝之復殺傷役逸克讓怒捕益急夜三鼓獨坐治爰書忽檐際有物墮聲甚厲隸役驚集燭之人也仆於地股已折矣搜之得利七首詰之則我宋帽頂也本劫公緩是獄不意被獲公好官也當得天相克讓知其善逸立鞫之斃杖下盜風遂戢一郡肅然會徐澤醇尙書督蜀委權川東道篆咸豐改元保荐川省吏治第一調成都尋擢江安糧儲道例以三月督糧赴通值河決豐北運河淪沒農部催漕急漕帥難之衆益觀望無敢任督運北上者克讓奮然曰天庾正供京師望哺曷可稽緩力請行八月杪抵北通州時逆氛犯楚江湖大震驚臘盡漕事竣南旋會總督陸建瀛棄師於老鼠峽單舸奔歸餘衆退保鎮江克讓聞之大驚偕將軍司道詣陸擬籌戰守陸三日不出克讓見事急乃募鄉勇三百親練之而賊已於三年正月陷安慶薄金陵城下矣幕客某以根儲非守土官風克讓以催漕出克讓怒曰建康據南北形勝京口當餉道咽喉若皆去

誰與守者門下士某知克讓之必死也遣人艤舟金陵城下告曰願爲師延一綫克讓集家衆詢之曰吾以此城爲塚矣爾等孰願出者弟克誠幼子松恩皆以願從死對遂謝某使二月十日賊用地雷攻城儀鳳門圯克讓督兵巷戰殺前鋒悍賊數十百人隨與將軍堵築缺口賊闌入者悉殲之十一日城復陷賊先登蟻進克讓所部鄉勇陳亡略盡肩膂受重傷力不支猶手刃一賊遂同仆地僕周鈞乘間匿尸短垣歸報閤門皆從殉無一逃者事聞贈太常寺卿六年奉省同鄉京官李鶴年侍御王樹滋太史張鵬飛主事等呈請都察院代奏賜諡奉旨予諡忠節生平事蹟宣付史館立傳並賞騎都尉世職建祠於今縣署之東春秋致祭

劉作肅字敬亭奉天瀋陽縣人世居城南白塔鋪道光辛巳舉人考取咸安宮官學漢教習期滿以知縣用選授天河縣知縣歷署凌雲武宣縣事有聲題補寧明州知州咸豐元年履



任兼理明江同知寧明曾經賊陷城垣墟燼作肅至繕城隍編保甲備守禦民賴安堵是時賊刦掠龍州上龍之民咸運貲携孥走寧明三年春賊衆萬餘攻城相持五月餘會城中糧竭衆議棄城走作肅泣諭曰賊久攻城死者甚衆怒我深矣若棄城突出爾民必無生理不如死守城陷縛我予賊可也衆感其言乃止賊久攻無所獲尋解圍去以城守功加知府銜賞戴花翎六年五月署太平府事時悍賊吳凌雲據土中州隴羅村屢寇太平作肅禦却之十年八月復寇太平城中無儲粟賊圍亟守陴者皆走賊踰城入作肅自投池中水淺不能死爲賊擁去以其居官清廉不忍殺之作肅乃吟絕命詩云父教我盡心君責我盡心力俱已竭捐軀何足惜城破而身存何以立天地一死報君親此外復奚冀投塘苦被拯絕粒以遂志七日赴幽冥自顧猶濡滯但得人民安妻孥甘併棄絕命質古人乾坤留正氣遂不食死其六弟與二僕姚雲吳貴同殉妻趙氏與三子家祥及幼女皆先死次子家鳳被執

不屈死作肅居官明敏持躬勤儉守寧明時賊驅一跛婦持僞示入城索金六千兩作肅書其後云本州只有一腔熱血兩袖清風仰即入城領取仍令持去俄一賊酋至城下作肅自燃炮擊殺之其慷慨閒暇類如此事定後奏聞奉旨照陣亡例賜卹賞騎都尉世職二僕亦議卹如制邑人葬於府城東南隅建祠祀之

文祥字博川瓜爾佳氏正紅旗滿洲人世居縣城南五家屯道光乙巳恩科進士以工部主事累遷員外郎郎中六年京察一等記名以道府用因親老乞留京供職七年二月授太僕寺少卿歷官詹事府詹事內閣學士刑部侍郎鑲黃旗副都統經筵講官尋入樞垣在軍機大臣上學習行走九年三月充會試總裁知貢舉十年五月英法聯軍犯順入天津海口欽帥忠親王僧格林沁拒戰不利兵退通州七月上降親征殊諭適僧邸密疏至請幸木蘭文祥以通州地異瀘淵人無寇準六飛冒險非萬全之道木蘭又無險可扼我能往寇亦能往

先後與大學士賈禎匡源杜瀚等力持不可八月上幸木蘭留署步軍統領與恭親王留守都城十月英法兵退疏請定期回鑾以安人心通商條約既定文祥首請設立總理各國事務衙門上善後六策先後奏請設立神機營並得旨報可嘗奏保雲貴總督張亮基又江西九江道沈葆楨湖北知縣劉蓉才堪大用請勅胡林翼破格錄用後俱爲中興名臣穆宗御極請解樞務不許初江蘇浙江省城收復上屢欲加恩樞臣文祥均再三辭上重違其意三年克金陵首逆就殄七月捷至諭樞臣同心輔治宜予優獎文祥仍固辭上鑒其誠僅賞太子太保銜廕姪凱肇員外郎而已四年以母老多病請回旗迎養時關外馬賊蜂起因令統神機營出關迎剿擒斬賊首馬傻子王宏義等分別剿撫解其黨尋調吏部尙書奏留兵餉授將軍都興阿俾清餘孽遂奏獨奉天地丁銀米停鋪捐十三年六月日本窺台灣事起文祥時力疾上疏曰方今時事可慮者甚多而以圖自強禦外患爲亟當議和之成無人不爲

自強之言十餘年來迄無成效其故由於鄙棄洋務者託空言而無實際徃於和局者又相安無事而恐啓猜嫌卽或悉心講求防務復阻於財賦不足而莫可施展今變端已形事機已迫若再不措意一旦大敵當前將何所恃伏願敕下戶部內務府寬籌餉需裁減浮用停不急之工作謀至急之海防俾部臣疆臣皆得專力圖維至自強之道首在虛懷納諫以求政治之得失勿以將順之言爲可喜勿以直遂之言爲可憎皇上憂勤惕厲斯內外臣工振刷精神不敢蹈玩泄之積習否則狃以爲安不思變計恐中外解體人心搖動其患有不可勝言者矣上嘉納之日本事平偕恭親王等策海防六事文祥復疏言臺灣一事以備虛力絀將就完結心殊鬱憤要不能不思患豫防前日總理各國事務衙門奏籌海防遠謀持久尙待從容會議而目前尤以防日本爲尤亟日本與浙閩一葦可杭倭人習慣食言難保必無後患且彼國近以改舊制失人心叛藩亂民一或崩潰則我濱海各口岌岌堪虞明季之

倭患可鑒也今臺灣一役彼理曲而勉就範圍儻他日強詞尋隙別啓釁端或陰與西洋各國合謀雖欲委曲遷就勢亦不能夫日本東洋一小國耳略習西洋兵法購一二鐵甲船竟公然爲中國難而沿海疆臣僉以倉卒無備不便決裂若不及今亟求整頓一日生變必更棘手請敕沈葆楨等悉心籌酌留在臺兵勇布置全臺事宜以善其後南北洋通商大臣迅速籌款購鐵甲船水雷礮臺及軍械勿以倭兵已退稍涉鬆懈得旨允行十二月授武英殿大學士光緒元年累以病請開缺上不許疊予假調理二年五月卒遺疏入上震悼輟朝御賜祭葬如禮贈太傅予諡文忠入祀賢良祠子熙治員外郎襲騎都尉世職

特普欽字忍魚姓張氏先世滄州人清初隸鑲紅旗漢軍祖官四川龍安府知府父金州水師營協鎮幼負大志沈默寡言未冠由諸生改習國語考中繙繹筆政後以鄉荐未售遂投筆從戎將軍富俊瑚松額歷聘充記室司奏牘補校尉台匪之變奉調赴閩賊平以功擢防

禦累遷協領髮逆犯天津京師大震奉旨帥兵入援賞二品頂戴花翎調補金州水師協領咸豐七年署吉林副都統尋署黑龍江將軍旋即真江省地當邊徼財政奇絀官兵俸餉向賴協撥乃議開墾呼蘭閒荒以裕餉源紓民困又以江北毗連俄境奏請殖民屯戍實邊庶免他族慕羶潛越之漸疏上嘉納圓明園之役英法通商定約既成俄人亦乘釁思逞圖佔邊境普欽遞次勘定疆界不稍退讓俄人讐服同治三年因親病陳情乞養回籍賦歸來篇以見志光緒己亥卒於里年八十七謚忠介生平著述有鴻泥印記奏稿詩文集若干卷行世長孫額騰額由部曹改官山西知州署天鎮縣知縣廉明有政聲庚子拳亂聯軍內犯城破殉節

布彥圖字東山錫伯人韓吉利氏世居瀋陽西北青堆子性忠直事親至孝猿臂善射由步甲充前鋒兵每冬季將軍赴圍場出獵彥圖必從一日罷獵會將暮彥圖單騎由山徑歸猝

遇虎矢不及設遂下馬持短刀待之虎竟避去陝甘回逆張格爾倡亂侯爵承平奉命進討  
檄調東三省練軍助剿彥圖入伍爲隊長每臨陣奮不顧身武勇爲諸軍冠曾一日手刃回  
逆三十餘兵威大振賊平振旅還奉擢補防禦嘉慶時上幸木蘭秋獮彥圖膺選從獵圍初  
合有奔鹿上屢射不中命彥圖一矢獲之上大喜錫孔雀翎賞賚無算累遷協領宣宗東巡  
彥圖迎駕山海關時值大雨蹕路隳毀彥圖冒雨隨在修治不誤御程尋授西安副都統陞  
見奏事稱旨一日召對十一次累官荊州西安將軍七十時特旨賜壽頒御書福壽字及上  
方珍物同時封圻皆以爲榮旋以老病乞休奉旨賞食將軍全俸年八十六卒於里彥圖生  
平服官以清慎勤三字自持解組後謝交游足跡不入城市家無宿費日以課農爲事其衷  
懷恬淡如此

文緒字殿元滿洲赫舍哩氏永陵防禦恩常之長子世居瀋陽南桃仙屯善騎射冠後從師

讀治章句學常投筆歎曰大丈夫當立功絕域如班定遠張博望豈能埋首故紙堆中老一世耶遂棄去入尺籍以軍功累遷校尉防禦佐領同治四年冬東山馬賊起當事者誤用熊文燦楊嗣昌故策賊僞投誠十二月就撫入省城遂劫獄反文緒躬請剿捕先後斬獲渠魁徐占一馬俊子等賊平以功授正紅旗協領尋監督內倉八界掌兵司印鑰以副都統記名光緒元年丈放海龍等處官地務求民隱捕大猾王二老虎置之法由是閭邑頌神明五閱月而事歲大府以卓異聞特授愛琿副都統愛琿與俄接壤犬牙雜錯交涉劇繁到任後首與俄人訂約凡俄商貿易者非經華官給照允許不得私自過江終其任邊境相安無事八年調補黑龍江副都統署將軍旋即真先後疏請設立學校修築海倫城設總管駐防編牲丁二千入軍充城守並創建諸慈善事尋以防禦某忤倫案先正法而後奏聞坐擅刑職官律被議去職歸里後顏所居曰歸耕堂日與村老牧豎游習課農桑夷然無得失意甲午欽



差大臣定安盛京將軍裕祿以東事亟創辦團防交章荐之卒不起庚子後旋卒子清普官  
至湖北襄陽道

姚協贊字馨圃奉天瀋陽人同治戊辰聯捷成進士入詞垣歷任甘肅鞏秦階道山東兗沂  
曹濟道陝西糧道河南河陝汝道署陝西按察使官翰林時充國史館提調故事館吏役滿  
例由提調請獎供事某值獎案私餽以金力却之仍如原考上及外擢甘省值兵燹後協贊  
首以培養元氣爲務尤愛士每校課皆親試所甄取多知名士一時吏治文風稱極盛焉會  
移山左兼筦河工每屆三汛親駐河干督率所屬巡視晝夜不懈終任河防慶安瀾未曾一  
決歲省巨帑無算調任秦中時捐廉創建學校購置書籍儀器俾資觀摩關中僻處西陲向  
號舊邦自是始知新學甲午權陝臬篆案無巨細皆親提訊平反冤獄甚衆時和議初定協  
贊感憤時局抗疏論之尋再調河南未到任卒

曾培祺字與九號壽軒奉天瀋陽縣人其先世出南武城曾氏之後清開國初徇魯地移民北徙隸正白旗漢軍籍三傳始遷瀋陽縣南武靖營遂家焉培祺少孤力學咸豐庚申年十八補博士弟子員同治十年辛酉成進士十三年散館授編修光緒九年遷御史尋丁內艱回籍主講萃升書院服闋起復十七年外擢河南衛輝府知府培祺敷政尙寬大務責實十年吏民化之尤憐才有愛士癖每試課必親月旦喜獎掖後進學風丕振郡治故濱河西城下舊有水門十八年夏雨潦大水河決自水門內注培祺冒雨親督所屬堵禦一晝夜乃止當是時吏民憫太守勞瘁有請暫憩者培祺流涕曰一城生命懸於頃刻忍自逸耶居民聞者感泣雷動婦嬰皆爭持畚缶助役於是閭郡之人始得免爲魚慶更生焉是年所屬瀕河諸縣以災告培祺不待上聞急籌鉅金賑之飢民全活無算事後大府聞之歎服常舉以爲有司楷式甲午中東事起朝議以東省留都根本重地檄調湘淮各軍赴援衛府地當孔道

軍旅徵發者往來絡繹當時地方酣嬉久不見兵驟嬰悉索公私交困培祺乃與諸將帥約嚴申軍紀民心始定庚子拳亂作燕晉塗炭兩宮西狩初拳黨始入河南培祺卽首諭所治嚴禁傳習於是衛輝一府獨免拳禍終以教案與西牧士齟齬去職改發山西中丞于蔭霖素重培祺延之入幕自是歷任撫軍松壽錫良皆倚如左右手迺變後叙西安轉運功薦以道員升用尋移晉省權潞安府事秋郡城南山農賽社民間訛言宵小將以是日舉事犯郡城培祺以鎮靜持之卒無佗變事後語人曰使當時一涉張皇能無激亂乎卸篆後尋權廟吳釐務潔躬率屬不事苛細商民德之至今弗衰三十四年冬旋里省墓無疾卒年六十六培祺生平篤學力行服膺濂洛然不廢考據之學入諫垣疏論時政多持大體先後分校春秋闈門下稱得士如歸安朱古微侍郎祖謀丹詔林二有太史壬常熟邵伯英編修松年泗水楊味春太守士燮旌德呂瑞田鳳岐錢唐張子虞預皆有聲於時子二長鎬光緒戊子科

舉人河工同知次遜國子生候選同知能世其家聲培祺晚年自號武靖村夫又號有樂堂  
主人遺著有有樂堂詩文集題跋雜稿若干卷

長子鎬字鄉生清河南衛輝府知府培祺之子幼失恃歷事繼母以孝聞性穎異能讀父書  
稍長受業於邑李伯川中翰達三朱蘭坡教授之禮遼陽房仲南孝廉毓琛三君並當世哲  
宿由是學益進年二十游邑庠明年光緒戊子舉於鄉以數奇七上春官不第乃改捐河工  
同知分發至豫時河督已裁任河道者爲

曹福元深器之初鎬父培祺以名翰林由御

史出守河南鎬隨侍十年色養兼至其後培祺移山西鎬歲由豫赴晉單騎省視以爲常戊

申冬鎬父培祺以省慕歸客藩廝一夕無疾卒鎬自豫棄官奔喪歸時鎬繼母氏金猶留居

晉臥疾甚劇鎬殯父後復馳赴晉躬侍醫藥數月母疾以瘳辛亥武昌兵起山西大震鎬命  
弟遜奉母出避己獨留守取父遺像書稿及先代手澤縫一布囊不少離身備事急負之出

走共命會時局稍稍定乃迎母弟歸癸丑冬以弟遜游學同侍母來京師尋以積痼病嘔血卒年四十七弟遜收其遺書若干卷待梓

施之博字濟航奉天瀋陽縣人幼聰穎六歲失怙執喪如成人弱冠後游邑庠戊午舉於鄉乙丑成進士授庶常改編修光緒乙亥分校秋闈所識拔多真才旋外擢雲南曲靖府知府抵郡後以邊徼嚴疆首重防衛修繕樓櫓濬治城隍撫緝蠻夷厲行保甲翕然稱治尋以疾請去職辛卯起復仍授原缺時有大股悍賊將由黔邊西犯之博聞警親率士卒出境防堵匪知有備不敢內竄一方賴以保全頃之歲旱大禱督府檄之博督理賑事之博不辭勞瘁涓滴必求實濟以是全活無算戊戌解組時之博長子宦山右乃迎養歸晉旋卒年八十多文字錫山奉天瀋陽縣人清宗室由宗學委學長擢福陵防禦巡守勤慎歷任總管皆倚任之尋遷左翼翼長三陵衙門協領時盛京兵侍溥頌方興辦養息牧墾務調充隨員保副

都統升銜庚子之變多文護守陵寢晝夜不懈和議成俄人欲於昭陵紅椿界內敷設鐵路多文抗議不少屈卒紆五里定路線拳亂既定伏莽不靖通化海龍等處胥爲潰兵馬賊巢窟官軍屢剿不利多文陳剿撫兼施之策賊平畧如所言尋補盛京副都統兼兩陵守護大臣三十三年制軍趙爾巽擴充宗室維城學堂照會兼辦因首輸五百園爲常年經費宗人聞風興起助資者二千餘人三十四年諮議局成立充會辦宣統初元卒於官

蘭天成字汝平奉天瀋陽縣人少孤事母至孝咸豐癸丑遭母喪哀毀逾恆及葬廬墓上三年初天成母李氏與叔母爲姊妹先後夫沒守志撫天成成立苦節終身鄉里稱節孝學使者雷以誠表其閭額曰姊妹妯娌節孝天成至是復請於朝俱得旨旌表如制凡建坊立碑皆躬親監視咸豐己未以知府銓秦中中丞曾望顏器其才將大用而天成知秦事且有變遽引疾歸歸未一歲徇亂作而全秦淪陷人始服其先見天成生平於學以治生爲要積資

數千萬而性慷慨喜施予尤愛重士人有以急難相告者雖數千金無不立應罕有署契券責償者嘗語人曰遺後人多金使子孫不肖終不能守曷若培植一二寒畯爲國家育材爲蒼生造福子孫猶可食其報乎時以爲名言每歲款輒倡義賑施粥糧捨衣藥鄰省災凋卹亦然嘗修學宮建義塾助書院肄業生童膏火設同善牛痘局葺補橋梁道路將軍崇厚奏請給予樂善好施匾額並准建坊甲申卒於里沒之日不訃而來弔者數千人子一永清官兵部郎中特賞花翎三品銜孫六長祖源花翎候選同知次祖恩弱冠補博士弟子員花翎同知次祖榮花翎二品銜分省補用道次祖光花翎同知祖述祖武皆循謹有士君子之風能世其家

鎮珍字聘九奇莫特氏蒙古鑲白旗人世居瀋陽城內同治癸酉科拔貢未及朝考丁外艱光緒丙子舉人公車八上卒不以他途進日事丹鉛經史著有經義備攷讀史管見鈔存庚

寅成進士朝考二等以主事用分刑部福建司補提牢廳主事治獄慈善慮囚必躬親恆數日不歸第甲午之役魏汝貴輩龔諸提鎮被逮凡大員入獄司獄牢役向有規費鏤珍晝夜檢視嚴禁需索諸人或賜輒仍准官役收受蓋存體制示體恤也吏役囚徒無不感其德惠晚年得子人以爲慈祥之報云鏤珍性友愛生平正直無私蓄嘗語家人曰吾承餘蔭微倖得微名居冷秩不致繫喪先德足矣生產非所計也俸滿引見以直隸州簡放未果行卒於京同官咸深惜之

王廉士字讓臣先世爲直隸臨榆人自廉士父澤周始移居於瀋少懷壯志欲以儒術致通顯爲國用嗣以家貧重嚴命不得已棄儒爲商賈然非所好也有暇則溫書史理舊業善擘窠書精篆刻一時搢紳先生爭與交游廉士治銀行商業久篤於信用東至鴨江西抵津榆南漸渤海北極蒙疆郵滙來往廢士一言勝十萬金云庚子俄人入奉天廉士携行中財物



傳記避蒙疆事定歸悉集各股東按籍還之當是時潰兵土匪滿道路而蒙地復荒僻風號盜區避難挾貨者無一幸免廉士獨委蛇羣盜間瀕殆者屢卒歷艱險得無恙完璧而歸由是信義愈著會以經濟恐慌設公議商局資救濟遂被推爲總理金融機關賴以恢復焉壬子年八十二卒廉士生平持身儉約治事以忠交友以信而商業學識道德尤非晚近所及子一輔智早卒孫光烈師範舉人郵傳部七品小京官有文學通六書工八法能世其家聲尹果字筱泉奉天瀋陽縣人世居城南蔡家屯道光丙午優貢己酉科舉人同治戊辰科進士以知縣改內閣中書光緒八年陳情乞養歸里三十四年重宴鹿鳴賞加內閣侍讀銜乙卯卒年九十七

尙賢字雅真號頌臣蒙古巴禹特氏奉天瀋陽人同治庚午舉人甲戌進士朝考授職編修累官翰林學士左春坊左庶子詹事府少詹事光祿寺正卿內閣學士光緒御極首陳奉天

利弊十事得旨嘉納久之值禮臣恭送玉牒大差故事宗府玉牒每更十禩輒派親王大臣  
恭送盛京尊藏牒差所經道路經費徭役鉅萬郡縣苦之至是尙賢奏請核實酌減以蘇民  
困始改牒差經費至多不得過十四萬終清之世遂爲定制壬午奉使青海賜唁扎薩克多  
羅郡王時正使爲上公成 年方十七尙賢乃與之約嚴禁家人需索由是僕役無敢滋擾  
及至西寧上公僕詞知郡王遺馬甚神駿驕命索贈嗣王以欽使不敢校事爲尙賢聞面責  
上公曰公爲國戚大臣身膺使節奈何強索人馬上公不得已卒以馬還之祭事竣多羅嗣  
王贖以珍物尙賢力却之使還疏陳西陲地方情形擬請變通兵制添設州縣招集流亡建  
立學校疏上報可甲申中法之役廷命會議直督覆奏尙賢疏陳該督所奏以越地爲可分  
賠款爲可允法人雖得越南形阻勢格豈能遽入滇粵但使訂約畫界當能永久相安可於  
中俄已事驗之此等言語欺飾童蒙亦且不信乃敢陳之奏牘今不必言後日之法請先論

今日之俄俄人西包關隴東括吉黑東北西北頻議地界明讓暗失邊疆日蹙駐兵侵擾民不堪命中俄接壤地多苦寒故俄人設施不易構難較遲若法人據有全越尋釁敗盟反復換約詎有一日之安則滇粵尙能爲我有乎及馬江之戰豐潤張佩綸侍郎得罪中外交謫九重震怒不測廷臣無敢申救尙賢與豐潤平日無杯水交獨上疏訟之力請保全孤臣以勵士氣疏上豐潤得從輕典會日朝事起尙賢密疏陳請保衛東藩嚴防日俄以重根本略謂法越連兵未解日朝構難又與俄人逼我吉黑時思觀釁若復聽其存亡不圖補救將見藩封日削益啓外夷窺伺之心棄越南棄朝鮮藩蔽盡失譬如人無四支何以圖存且朝鮮存亡所係與琉球不同較越南尤重日俄兩強耽耽朝鮮無非隱謀圖我三省土地朝鮮失則三省危朝鮮存則三省安云云尋吳大澂奉使議約以無全權字樣日人擯不與議尙賢又抗疏力爭若此不問是自棄東藩十年之後朝鮮必爲越南之續三省根本重地亦非復

我有矣疏三上皆不省丙戌外遷駐藏幫辦大臣尋以親老告養特旨留京另候簡用壬辰丁艱回籍守制甲午中東以爭朝鮮事失和我軍戰不利營海相繼淪陷奉直大震廣東陸路提督唐仁廉奉命幫辦軍務初至奉相度地勢欲置炮城垣以爲守城中居民咸驚駭遷避時制軍裕祿阻之不可乃曰前內閣學士尙賢今在籍何不詢之仁廉果就問方略尙賢因令其移前軍守虎皮驛城中人心始安泊停戰省中難民鬻集無所得食尙賢復請仁廉裕祿開倉賑濟全活無算和議定後仁廉裕祿擬交章薦以時事日非卒不起戊戌詔停科舉行新政時誠勇公依克唐阿督奉關聘主校萃升書院經古策論月課所識拔多知名士庚子拳亂後地方不靖盜賊蜂起以紳耆公舉辦理省城南路守望局籌餉置械不費官家一餉不戮無辜一人而閭閻賴以安堵辛亥冬國體改建遂歸里乙卯六月卒年七十一尙賢生平慷慨躋直在朝杜絕苞苴彈劾不避權貴卒以是未大用官翰林時嘗慨奉省士風

不振疏請疏通科場事宜奉直專選教職添設繙繹學額又以八旗無主僕丁出身無路奏請查照成案分別出籍崇文門關稅違例濫徵苛罰逼斃多命先後言路參揭皆不報乃抗疏劾之卒按如律尤言人所不敢言歿後論者謂爲不愧有清一代直臣云子四長貴璋見孝子門次貴筠陸軍部主事次貴琦次貴璘

張慶吉漢軍鑲藍旗人官佐領清同治二年冬省北昌圖府榆樹台盜起慶吉督兵進剿以衆寡不敵陷賊圍手殺悍賊數十力盡被害同死者防禦顧文楷亦鑲藍旗人兵丁從死者數十三年賊平各旂兵弁迎慶吉及文楷與兵丁骸骨叢櫬葬於福勝關外建碑紀其事

張慶普字博盦漢軍正黃旗人世居縣城西北造化屯光緒丙子恩科貢生性孝友清介自操生平常以名節自勵庚子夏拳黨初起慶普歎曰此妖孽也國禍無日矣秋閏月俄人入奉天留守以下皆避去俄人尋略附郭地慶普具朝衣冠以待俄人至慶普危坐不動俄人

去其冠慶普復取冠之因數之曰君子死必正其冠汝國不義侵我土地虐我黎民行當自及遂投井死俄人驚去事定門弟子列狀上聞得旨廕一子縣丞旌表如例

錫特恆額愛辛覺羅氏昭陵世襲防禦世居地載關庚子之亂俄人闌入陵山震驚寢廟錫特恆額遂自縊奉旨旌表

訥欽字子安瓜爾佳氏盛京滿洲正白旗人幼失怙奮志讀書長入行伍事孀慈以孝聞爲人魁梧奇偉見義勇爲前清同治年間以緝捕勳能初受知於將軍都興阿隨同前往山東直隸軍營內防剿因出力疊經奏保驍騎校防禦佐領等缺補用并保戴藍翎光緒年間又受知於軍督崇實選放正紅旗滿洲協領復受知於將軍崇綺屢次保荐卓異又受知於軍督慶裕奏保副都統銜並賞換花翎旋充盛字營統領因辦公出力又受知於練兵大臣定安軍督裕祿奏保以副都統記名遇缺請旨簡放十七年補授山東青州副都統二十一年

因病請假回旗病愈起復二十十四年奉旨派充盛京仁字軍統領二十六年拳匪之變帶隊保守山海關旋奉旨補授盛京副都統而公竟以國事危急兵單餉絀志不得伸鬱鬱而歿生平歷充八旗馬隊統領管理捷勝營事務督轄營務處幫辦軍署兵司掌印各差均能克勤厥職而帶兵尤爲嚴肅每遇外出緝捕率身先士卒同其甘苦所經之處秋毫不犯是以軍民有口皆碑同聲感戴而又風義是敦所在名流往往傾倒至其公忠報國之心至老而彌篤平居與人言時時誦魏武老驥伏櫪志在千里二語以自況云公無子以胞弟扎欽之子恩澤爲嗣前任興京副都統現任京都正白旗蒙古都統

王慶雲字卿五號縵亭鑲藍旗漢軍人四歲失怙事兄以悌聞少穎敏讀書記誦絕人尤精滿蒙語言文字嘗從師受繙書八月卽能通漢譯師歎弗如是時奉天外政當日俄未至前惟中蒙交涉繁劇邊境居民常因小忿釀鉅案地方官吏折獄以言文不通往往棘手慶雲

歷任軍署牧羣司時主蒙務凡遇藩部文移山蒙案牘逐譯明確皆得情實於是蒙人大畏服至稱之爲巴克什巴克什者蒙古語尊稱師也尋將軍清愨公都興阿設立蒙文官學奏充官學教習自是奉天始重蒙文慶雲先後教授弟子成名者數十百人而惟杜文炳陳榮德爲得其傳榮德字錦廷清協領宣統初元聘充蒙文學堂監督手譯商務印書館國文教科書十卷爲滿蒙漢三體文書成不自以爲名每曰此吾師志也制軍錫良以全書進呈傳旨嘉獎慶雲家居時諸門人有以蒙文貴顯者不忘德教公題經師人表額其門及歿復於塋前勒碑誌其事文炳另有傳

文炳字魁廷杜爾伯特氏鑲黃旗蒙古人世居奉天瀋陽縣以蒙文官學畢業生歷充步營司牧羣司書記鑲藍旗官學教習交涉局督轅文案處滿蒙文繙譯旗務司庶務界官正白旗巴爾虎校尉廂藍旗蒙古佐領光緒初奉省初設蒙文官學主講席者爲王慶雲先生考



取官學生文炳與選同舍生以其寒峻羸擲掄之擯不與同食宿文炳每晝入學受繙書夜歸寄宿靈臺下則代人執踐更役藉博衣食資王先生嘉其貧而好學獨刮目待之卒業後王先生謝病歸十四旂佐公荐文炳繼其任兼辦各盟王旗事務一時稱得人任交涉局時有俄人通事藍鳳山者糾合亡命在東流圍場越貨勒捐以有俄人護符地方有司無敢捕者文炳奉檄往計擒之圍場始安二十四年查辦扎圖王旗郡王烏太案件執憲除私蒙人呼爲鐵面二十八年隨欽使裕查案各盟王旗平反冤獄數十起蒙人德之三十二年充任蒙文學堂校長教育有方造就人才甚衆年六十無疾卒子春德官江西知縣能世其學鳳山字子岐奉天瀋陽人清室覺羅世居城東南黑牛屯庚子亂後盜賊蜂起鳳山首倡鄉團聯合鳳集堡等五十餘村保衛里閭先後捕獲巨盜無算窟窿山張國武爲地方著名積匪恃俄兵爲護符兵役無敢過問者鳳山率團勇搜捕國武已先遁去時甫議和俄兵猶未

退國武賄囑俄兵以搜查槍械爲名突至鳳山家縛之去事聞省垣將軍照會俄官請釋行至本溪中途經太資河爲俄人所賊中要害死沉屍於河國武尋正法鳳山冤始白宣統初元紳耆尹果袁金鎧等呈請入祀地方昭忠祠春秋致祭至今不衰

李啟昌字東字號卜堂奉天瀋陽縣人少聰穎弱冠後游邑庠考取道光丁酉科以選拔貢成均尋考取盛京宗室覺羅學漢教習三年任滿以知縣用歷任山東定陶曲阜郟城知縣有政聲卒年六十九子芳壽字絳年號菊生考取翼學漢教習署開原縣訓導

靳德字子元內務府漢軍正黃旗人居瀋陽縣西北造化屯與張慶普同里又同補博士弟子員光緒八年以歲試貢成均授訓導十七年分發本省歷署義州學正懷德訓導復州學正兼主講橫山書院時值甲辰之役以力護聖廟有功擢金州廳訓導廳治文風鄙陋自靳德視事始建學校後以積勞卒於官

賈完璞字曉峰奉天瀋陽縣城北人由廩生考取光緒己卯科優貢以教職選用十四年署  
寧遠州教諭任滿轉署新民府儒學正堂旋遷康平縣卒於任完璞生平性忠鯁不慕權勢  
庚子俄亂時誓以身殉國書絕命詞一律有曰人生自古誰無死身死名留骨亦香卒爲家  
人所救得不死其慷慨忠義有如此

王柱林奉天瀋陽縣人世居城北李七堡子以貢生歷任兵部外郎性慈善歲捨醫藥棺槨  
無算族中有貧乏者輒分產資助以爲常又仿古義田創設善地本村德之

富恆泰字階平少聰敏有至性弱冠入庠光緒壬午科舉人以試用知縣指分直隸署新樂  
縣事興利除弊值庚子拳亂民教交涉繁劇御差供應軫張恆泰措置裕如上不病國下不  
蠹民新樂之人戴之如父張蔭桓司寇以謫戍經新邑見其治績歎賞之以爲于陸之亞當  
是時京師和局掬定彞兵數外出搜括一日突有某國軍隊至署索車馬供應市民皆驚散

吏役奔避恒泰挺身詰所來彘兵怒縛之恒泰神色不動援約據理侃侃爭彘兵辭屈乃謝罪去由是聲震一時合肥李文忠公督直素器其才調任獲鹿項城嗣任奏保循良五人恒泰列第三蒙傳旨嘉獎尋以勞瘁卒於官

富恆善字志元光緒己卯科舉人乙未科進士以知縣分發陝西歷充資州厘金稅差清節自持額羨增溢川督錫良奏保同知尋補安縣知縣有惠政卒後吏民爲建去思碑以誌遺愛

文榮讓藍旗滿洲人納喇氏善騎射通清漢書輕財好施以是家中落官防禦時署養西牧西界事務兼理詞訟有惠政服官清介不名一錢士民德之養西牧界地接朝陽素號盜藪光緒甲午萑苻羣起文榮創辦團練地方賴以安堵任滿之日紳民餞送者道相屬文榮有留別父老詩云愧無一善慰相知底事同深去後思把袂從茲各分手暮雲春樹幾神馳孝

廉孟奎章和韻云三載官聲所共知甘棠遺愛繫人思何時最是魂銷處唱罷驪歌賦載馳  
其二官游到處有相知難得同深去後思只恨攀轅留不住臨風悵望一神馳

王汝濟字博航鏤黃旗漢軍人同治癸酉科拔貢生戶部七品小京官能文善書光緒初考  
充漢軍機章京領班累遷至太常寺少卿汝濟生平篤於鄉誼爲清末葉所罕見蓋猶有古  
風云

福祿康阿字海珊劉氏廂白旂滿洲人世居奉天瀋陽縣歷官鳳凰驍騎校牛莊防禦寧遠  
掌路記佐領以督修城垣功加協領甲午之役日兵輪北駛進窺畿輔砲擊寧遠海岸欲乘  
虛土陸內犯時駐守城外釣魚台有大同馬隊一營望風潰避入城知州賀筱泉聞寇至謀  
棄城走福祿康阿力阻之乃親督旗兵上城守衛并嚴令大同軍士仍出城設防倉猝布置  
聞變不亂城中人心始定日兵輪知有備尋亦引去二十年擢福陵翼長尋著總管辛亥歸

里卒

吳廣音奉天瀋陽縣人世居城北蒲河歷官牛莊防守尉甲辰日俄之役俄軍退保沙河日兵進逼遼陽俄人別遣奇兵數萬襲日兵後路至牛莊兩軍將交綏廣音聞警不及車騎急徒步入俄壘責其破壞中立侵越戰綫俄人迫於理不得已引去宣統二年歲歉盜羣起一日突有馬賊百餘鼓噪入城劫掠廣音親率兵警接戰斃其渠魁賊黨始敗退旋擢盛京廂黃旗協領卒

王介福奉天瀋陽縣人乾隆間選拔嘉慶三年任福建興化府知府公正廉明有政聲歿後吏民思遺愛立祠祀之

孫乃鼎字際庭先世山左人光緒甲午後始北徙居於奉天瀋陽南八鄉金家子遂隸瀋陽縣籍幼勤學咸豐壬戌補博士弟子員同治戊辰以優行貢成均朝考列教職候選光緒庚

辰署任直隸平山縣訓導歷官海城縣訓導興京分府教授兼攝通化懷仁儒學事丁酉實授平山縣原缺乃鼎筮仕伊始自以冷署閒曹無濟世事乃專心教育所蒞各縣提倡學務獎進寒畯興義塾修聖廟皆不遺餘力復任平山時前所授弟子郊迎之有以輿者有以騎者爭奉之乃鼎不得已乃徒步入城至署其教澤入人深者如此庚子以積勞歿於官

安明義字勇福世居城北李七堡子其先撫寧人少孤家貧事母以孝聞年十八充鄉長剛正不阿里中豪猾皆憚之時歲飢宵小羣起明義設堡防立義倉又以地瀕遼河歲罹水患嘗倡議濬河由是始免昏墊民至今德之年五十餘積資中產凡親友宗族有以急難告貸者無不立應明義嘗曰貧苦境吾曾歷之今有餘當濟人不足也年七十四無疾卒

安國志字俊三勇福之孫其先世撫寧人後移縣城北李七堡子世有清德幼失怙事母至孝年二十八補博士弟子員光緒辛卯科恩貢例選直隸州州判以老親在堂不忍遠宦乃

改教職癸巳署鐵嶺縣教諭未赴任而卒年五十三著有刻忍堂文集及經解待梓

董宗舒字福臣瀋陽縣城西寧官屯人光緒壬午科舉人候選知縣光緒十四年歲大禋宗舒於本村設義倉以平糶定春貸秋償之法貧民便之並附設義學以教育寒畯一時成名者甚衆初遼陽州東北磨笄山本溪湖各煤洞虐待工人慘斃多命宗舒具稟三揭之始下諭禁止自是煤洞虐工之風稍息宗舒生平見義勇爲凡有關於社會風俗地方公益之事知無不言先後條陳利弊大府多採擇施行遺著詩文甚富皆藏於家

趙德春廂藍旗漢軍人世居奉天瀋陽縣城西北小方士屯幼精騎射光緒初入尺籍隸捷勝營累積功至驍騎校吉林馬隊哨官甲午之役充敵愾軍中哨哨官每臨陣身先士卒所擒斬首虜獨衆誠勇公依克唐阿奇其才奏補中前所廂藍旗驍騎校德春撫綏旂漢講求利弊有循聲去任時居人感其惠政資奉萬民衣傘攀轅走送數十里表去思復立壻匾額



署門誌遺愛尋調充黑龍江練軍一營營官兼十五營總令官庚子拳禍起俄人大舉南侵將軍壽山檄諸軍迎剿興安嶺前鋒戰不利諸營皆退走德春獨率所部力戰時俄兵以巨炮進薄德春營中無砲衆寡復不敵遂陣沒部衆見德春亡爭前死敵無一遁者宣統三年德旗呈請議叙未果興安嶺居民感其忠義並所部五百人立社祠之

楊毓芳字文海奉天瀋陽縣城北人性孝友幼嗜學光緒九年游邑庠十三年秋大水遼河爲災歲大飢毓芳倡議築堤捍水偕紳耆合詞請於軍署乃以奉軍翼長左寶貴督率所部修治始事毓芳號於衆曰吾爲民請命築此長堤堤如不成吾誓隨遼水俱逝矣聞者咸泣執役恐後而堤以成由是河不爲患二十六年俄人入奉天國憲叢勝盜賊蜂起毓芳首辦鄉團聯合村屯五十餘練團勇七百紀律嚴肅前後擒斬巨賊無算三十一年奉檄辦理地方警察成績尤著居民至今德之

金福英字菊圃奉天瀋陽縣人弱冠入邑庠同治二年將軍金順征陝甘累官雲南南安州知州署楚雄府抵任三月清結積案百餘起暇則課士勸農考稱最尋經黑龍江將軍奏保覲見後發交江省差委充交涉局總辦每與俄人議事輒據理抗辯不少屈卒能保持國權折衝樽俎庚子後回雲南楚雄府任以積勞卒於官士民爲之罷市一日以誌遺愛云

金魁多字祝三奉天瀋陽縣人少精騎射年十六隨父福英從軍陝甘每臨陣輒身先士卒所向摧廓大軍攻昌縣呼圖壁時魁多率兵猛攻頭部已受彈傷血涔涔滴猶裹創力戰卒破其城累官至記名副都統統領奉字後軍甲午之役魁多奉檄進軍日兵邀之於江口諸軍背水拒戰不利皆退走覆溺兵士無算魁多獨率所部殿後死戰日兵不敢逼餘軍始得渡是役他將領皆以失利獲嚴譴魁多獨軍功自如人由是服其勇議和後統領奉軍駐防蒙古剿捕嚴肅萑苻斂迹尋簡金州副都統未到任以積勞觸發舊傷卒

金魁保字錫臣魁多從兄年十七隨叔福英從軍征陝甘隨營理軍書無晝夜倚馬草檄下筆立就當是時客軍麇集將士爭功無所統係魁保調輯諸將帥間使收指臂之効以是得成功瑪納斯之役巨憯旣殲累以功至記名副都統光緒二十一年吉林將軍長順奏調充靖邊軍前路統領駐防琿春與俄屯戍相峙魁保扞擻嚴整有法度常與俄將士公讌會獵往還得羊叔子遺意終任邊境無事二十三年以母喪哀毀滅性一慟而卒將軍長順以至行無兩奏請優卹得旨特蔭騎都尉世職子常裕承襲

金魁欽字敬齋漢軍鑲紅旗人由附生納捐巡檢爲人剛直好義光緒庚子拳匪占據萃升書院魁欽挺身前往逼令別遷匪甚銜之嗣匪等至城南麻仲屯借端勒賄縛載會首數人路過魁欽門首魁欽是時爲總會長村人欲見而訴之及匪見魁欽遂舍衆人而縛欽載以入城至萃升書院門首匪卽喝辱欽遂大罵羣匪以刀斷其兩臂至庭則身無完膚仍大罵

不止遂遇害亂平後士林哀之稟請優卹將軍增具奏奉旨照陣亡例蔭一子入監讀書期滿以庫大使用賜卹銀八十兩見舊志

文衡  
玉林

係同胞兄弟滿洲人住城北大含英屯昭陵尙香人光緒乙巳年二月間日俄奉天之戰交鋒於昭陵右掖兄弟二人隨總管護守隆恩門其夜俄兵敗退日兵進擊闌入禁山兄弟同時被難將軍趙彙案請獎見舊志

### 流寓

張春明陝西潼州人由舉人歷官僉事備兵於永平崇禎四年清太宗入永平城破被執妻翟氏自殺太宗既得春大喜欲官之春不屈太宗善遇之飲食與服犒賚甚厚春悉不受向西南正坐日夜哭不絕聲太宗更遣左右令爲好語勞春間自往視之春不動而罵以爲常乃令穴壁爲牖時屏車騎間行從牖竊視春正襟西南向而坐微知壁間有人則大罵左右

曰彼囚人也安有萬乘而爲囚人屈者耶太宗曰是何言吾從史傳中見文天祥以爲神人  
今乃真得見文天祥耳始翟氏死春不知後有人來言春乃設位而哭太宗命以少牢往祭  
之春却之又自爲祭文首記崇禎年號使人書之人有奏於太宗者太宗曰是固然彼安肯  
用我正朔且彼婦又安知我之正朔卒命書之是時洪承疇亦留三年矣始得承疇也太宗  
亦善遇之承疇不屈太宗嘗略得秀才數十人命詣承疇試以文第其高下上之太宗大喜  
又命詣春春叱之曰若旣讀古人書奈何於此求試速去毋污我太宗聞之益善之而春卒  
不降春留九年御其出關時之衣冠至敝不肯易坐必西南向將死太宗遣人問所欲春曰  
若移我居遼陽得近中國則死無恨矣太宗將許之左右皆曰彼居我國久知我要領若有  
不測不獨亡春乃不許居有頃春不食而死太宗曰我於春未嘗逆其意獨奈何不聽其居  
遼陽乎遂葬於遼陽明聞之贈春副都御史按湯文正公斌所撰本傳云張春幽禁故址在

故奉天將軍衙門西三官廟內

孝子

組璽國戚之後性至孝母歿廬墓側二年哀毀盡禮康熙五十二年旌表祀於瀋陽書院孝

子祠

王纘漢軍正白旗人拔貢生以孝聞歿後入祀孝子祠

鐵範金字式之瀋陽縣人本天方教民性至孝母疾親侍湯藥衣不帶夜不枕一夕母忽暈絕範金割腕肉和湯以進母立甦康熙丁丑成進士選庶常授翰林院檢討簡江南學政未至卒

方慶祥字子餘邑諸生世居瀋陽城東深井子父純前母張生三子而卒繼室慶祥母馮亦生子三而慶祥最少生有至性幼時事前母諸昆如同母能得父心年十四喪父哭踊執禮

如成人鄉里耆老咸異之及稍長痛父早世不逮養益刻力奉母嘗設塾於鄉爲童子師與弟子言必先教孝身自食糲衣鶉所得修脯悉以供母年三十八補博士弟子員娶康氏早卒慶祥一身以子兼婦職進食滌器皆躬親終身母不知世乃有未亡人也先是慶祥父在日以家貧食指繁令慶祥兄弟六人析居便生齒至是慶祥力請於諸兄復合爨如初於是里人義之稱其所居堂曰六合母後老病慶祥侍疾目不睫帶不結數月日夜禱天請以身代母嘗徒步迎醫百里外入夜復携藥餌返躬自調劑嘗而後進而母卒不起慶祥哀毀泣血目盡腫三日水漿不入口村中會喪者皆伏地助悲哀比葬藉草廬墓側朝夕巡墓號泣道路聞者皆垂涕不忍過墓下三載孺慕如初喪庚子拳亂村人盡室逃避慶祥獨留守墓嘗絕食數日終不去亂定聞於大府特旨旌表民國初元卒里人列狀上聞史館立傳越二

年春三月奉木主入孝子祠並勒碑紀其事

劉齊琦字聘臣士默特氏盛京蒙古鑲白旗附生父德謙業儒累代忠厚傳家世居縣北四十里大古城子生自幼天性渾厚心地樸誠啼笑歌泣不與羣兒同人皆異之稍長讀書尤聰穎宗族鄉黨之間恂恂稱孝弟焉前清光緒二十五年生母病生躬奉湯藥衣不解帶者累月母卒生則呼搶不欲生居憂二年如一日繼母張氏生事之益謹三十一年日俄之戰凡鐵道附近之處胥遭蹂躪到處土匪蜂起生不得已先送其父與弟避居省城後復特送其母赴省中途遇日軍與俄軍戰銃彈如雨生恐母被傷同避堤側急以身遮護之母曰吾老矣死何憾子盍他往生日母在此兒將焉往復遮護如初須臾槍彈中生腦不終日而歿母由是得生事定之後士林高其行誼舉人田璞周尙文等三十餘人具呈大府請以孝子旌卹以爲純臣爲國盡忠貞女爲夫守節均有褒揚之典若該生者至孝性成處常之純良旣如彼臨難之從容又如此設不與忠臣貞女同膺褒獎其何以振綱常而維世教旋聞由



大吏彙案達部准駁未見回文然捐生以事親固已不愧爲孝矣故仍錄其梗概以附方孝子之後云

貴璋字佩實蒙古巴禹特氏奉天瀋陽人清內閣學士尙賢之子也生有至性幼時母嘗邁疾貴璋與姊蓮生更代執役侍母疾月餘母愈乃己由是鄉鄙稱尙氏兩兒孝庚子俄人入奉天盡城竄匿貴璋時年十七肩負宗先木主翼家人出避難途行遇賊輒以身護父母先賊見狀亦捨之會亂定乃侍親歸里學士暮年田居喜農事貴璋嘗躬耒耜耕隴上雜僮僕操作見者不知其爲貴介裔貴璋性慈祥寡嗜欲好急人之難由是鄉人重之甲辰日俄事起貴璋奉諸母弟妹入城已獨留鑿土窖居之守墓不去會戰事亟俄人迫之出戰線貴璋乃痛哭拜墓去乙卯父病貴璋躬求藥物嘗星夜徒步往返行數十里於是亦病病中昏瞽輒呼願減已算延父齡及父歿貴璋以病不能親含殮則大恨日夜號泣不絕聲後十二

日亦卒里人哀其愚孝識與不識咸往弔焉

列女

明蕭節婦懿路人萬歷間夫死守節或欲奪其志因自縊邑人刻石以表其烈題云拂節更夫下車即縊立石樹聲乾坤正氣

袁氏雙烈十里河驛丞袁陞之二女也父欲以非禮婚里豪二女皆抗節自縊其葬處俗呼雙烈墓後於光緒年間經邑紳內閣學士尙賢爲之請於朝得旨旌表

王國勳妻汪氏漢軍正白旗人國勳早卒汪氏守貞教子至孫琮中乙卯科舉人壽八十五卒

王國輔妻孫氏夫歿遺一子朝夕督課教育有方後襲佐領孫氏撫姪輩衣食過於己子尤人所難與汪氏並稱一門雙節云

愛辛覺羅氏正黃旗滿洲茂才果興額之妻筆政德陞長女果興額先娶溫撤亨氏生二子長恆升次恆善甫晬溫氏故娶氏爲繼室生子一恆泰未幾果興額卒氏撫養二子三十餘年後恆善成進士恆泰中式舉人皆官知縣兄弟並知名於時光緒年間旌表

舉人吳濤之妻李氏夫亡時年二十一一家貧無子繼姪爲嗣苦志五十餘年

茂才李文耀之妻田氏讀書通大義青年守節家貧設館課蒙以自給女梅玉孝母不字與母共守義終身

選人連喜之妻成氏於光緒二十七年四月夫病故遂仰藥以殉

選人李棠蔭之妻孫氏自十六歲于歸三十歲夫故守節四十餘年

陳士偉之妻劉氏瀋陽縣人年二十夫亡擬以身殉父母諭以姑老子幼殉節事小孝慈爲大始泣從命後姑病嘗藥滌垢夜不就枕者逾月姑卒卜葬天溝山移夫柩附葬氏見夫棺

仰天長號投身壙中曰姑歿子長吾今可以同穴矣二子文言正言倉黃號慟跪勸不已親族復力挽之氏乃出自是臥病不復起尋卒

畢國棟之妻趙氏夫亡子甫晬翁姑繼歿趙氏孀且貧撫孤成立守節五十餘載

周永春之妻陳氏光緒二十七年值匪亂欲犯之氏罵賊抗節不屈遂遇害

瀋陽縣民女盧慧哥年十九光緒庚子拳亂避難匪逼婚不從投井殉節

劉萬亮之女桂蘭親老無子桂蘭矢志不字孝養終身有北宮嬰兒子之風

旗人尉林次女黑姐年十九庚子之變投井殉節

李墀之妻蘇氏年十七于歸二十六歲夫故守節四十餘年

趙進啟之妻馮氏瀋陽縣人夫亡遺一子生僅八日家赤貧馮氏事親撫子守節終身

劉連登之妻曹氏瀋陽縣人夫亡時姑衰子稚曹氏苦節五十餘年

牛玉田之妻李氏年十七于歸二十二歲夫故守節五十餘年

陳葛箱之妻白氏年二十二于歸二十八夫故守節五十餘年

愛辛覺羅氏昭陵世襲防禦錫特恒額女世居地載關庚子之役俄人入城投井殉節

奇莫特雙鼎之妻趙氏十九于歸二十九夫故遺腹子扎昆珠補領催後旋亦身故遺一子

果爾敏氏早歲撫孤晚年課孫計守節六十餘載艱苦備嘗壽九十七卒其後子孫科第館

選相繼人以爲節孝之報云

李 妻陶氏漢軍人養親撫孤五十餘年嘉慶九年建坊旌表

妻賈氏漢軍人夫亡矢志守貞嘉慶元年建坊旌表

尙賢之長女蓮生光緒三十年五月因母吳札拉氏病歿遺絕命書毀生以殉

譚德三之妻關氏年十七于歸井臼親操不辭勞瘁二十七歲夫亡守節事姑以孝聞

韓之恩之妻趙氏年二十于歸二十二歲夫亡養老撫幼守志終身

關白氏校政博崇武之妻廂白旗滿洲人世居瀋陽縣城東鴿子峪於二十九歲夫亡守節教養子女成立皆有義方光緒八年經本佐呈請建坊旌表年八十二卒

關常慶之妻李氏廂白旗滿洲人與關白氏同宗夫亡守節家貧撫養遺孤成立六十九卒光緒三十二年呈請建坊旌表

關達杭阿之妻繆氏與關白氏關李氏同族夫亡矢志守貞人或以無子勸之改適終不從宣統二年呈請建坊旌表

關達凌阿之妻王氏夫亡守節宣統二年呈請建坊旌表

王寶昌之妻劉氏戶部人先世撫順人後移瀋陽縣城內懷遠關夫亡矢志守貞先緒二十八年建坊旌表

陳慶玉之妻張玉鳳瀋陽縣北平羅堡人年二十二夫沒祇遺一女張氏明從殉翁姑勸之  
乃止其後親黨有以再醮爲言者氏以死自矢遂繼從侄爲嗣事翁姑以孝聞撫嗣子以慈  
著鄉里稱之光緒二十四年奉旨建坊旌表年七十九卒民國二年由士紳公請入祀節婦  
祠

劉國富之妻佟氏奉天瀋陽縣人世居城東南窰溝夫卒僅遺一女繼承親侄爲嗣矢志守  
貞苦節四十餘年教子成立於宣統元年奉旨建坊旌表

崔崑之妻劉氏瀋陽縣東紅旗台人家貧年二十一適崔氏時曾祖垂老得痿痺病飲食  
便溺皆須人氏親侍湯藥起居無倦色無怨言夫以積勞病嘔血沒氏矢志守貞撫二子昱  
林逢林忍死甘貧後皆成立有聲庠序間年七十餘卒經紳民呈請建坊旌表入祀節婦祠  
劉俊之妻程氏奉天瀋陽縣城南莊科程德恆長女有淑德年十七歸楊士屯劉氏夫卒時

氏無所出家綦貧翁姑老且病有富人慕其德容以厚聘陋媒氏求爲室者氏涕泣言曰未  
亡人命薄如是敢復虧節違天乎且吾去二老誰與養事二夫不義棄翁姑不仁不仁不義  
生不如死乃持刀自誓衆乃止會姑病痿輾轉牀蓐十餘年氏以女紅易藥餌鄉里稱節孝  
後翁先沒又六年姑乃逝先後營喪葬皆氏一人罔不盡禮光緒二十一年呈請旌表奉旨  
建坊以紬於資未果丁未冬鄉人慕其苦節純孝公釀金數百坊始立茂才明恕并刻石記  
其事

石富君之妻王氏內務府正白旗漢軍人世居瀋陽縣南紅綾堡夫亡家綦貧身無所出性  
沈默事翁姑以孝聞苦節四十餘年宣統三年建坊旌表

陳國清之妻葉氏奉天瀋陽縣人世居城西北蘇家窩棚夫卒時無所出陳氏故爲北鄉名  
族親丁甚衆氏於夫亡後矢志守貞親操井臼與娣姒同甘苦不以孤寡自異鄉人皆稱之



七十後始以從子

爲嗣教之讀書嘗質篋具助膏火以底於成母教之力居多每語人

余不敢以古列女自居竊願以古之列女爲法年八十四無疾卒

魏允安之妻鄭氏奉天瀋陽縣人世居城北孟家台夫沒時年二十家綦貧無所出氏欲以身殉觸樹崩仆暈絕不死又自投於河復以救得免家人群以從死事小養親事大勸勉之於是乃躬操井臼奉二親代子職鄉里稱節孝年八十餘始卒光緒庚子旌表

張景仁之妻陳氏正藍旗漢軍人夫卒守節四十餘年柏舟自矢於光緒三十一年旌表

博文之妻朱氏奉天瀋陽縣人夫卒守節光緒三十四年東督徐世昌以青年矢志白首完

貞彙咨禮部請旨旌表

王郭氏奉天瀋陽縣城北李七堡子人于歸甫三月而夫卒氏矢志守貞苦節七十餘年於光

緒間建坊旌表

王呂氏與王郭氏同里性嚴肅夫卒氏以身殉節於光緒年間建坊旌表

何奎武之妻曹氏奉天瀋陽縣人世居城東大仁境屯性慈善五世同居卒時年八十六宣統三年建坊旌表

蘭恆昌之妻李氏山右人李遠公之女幼端莊年十七于歸越二載夫歿矢志撫孤苦節五十餘年恆昌之弟亦娶於李先後守節姊妹妯娌共茹冰霜爲尋常節孝所罕見學使者雷以誠題姊妹妯娌節孝匾額其廬咸豐十年旌表建坊

劉福恩之妻葉氏戶部漢軍人夫卒守節五十餘年教子成立爲近代節母冠光緒十二年鄉人公舉節孝得旨旌表建坊如制子世榮前清日講起居注官翰林院侍講學士服官清介工古文辭蔚然爲一代儒宗論者謂得之母教居多云

郭鳴龍之妻張氏世居城東木廠年二十二夫故遺一子教育成人守節六十六年壽八十

八無疾而終

氏族

前清皇族 有二一舊居宗室覺羅一新居宗室覺羅舊居者係清初留守陪都分左右翼  
八旗新居者由北京移居於省城東二里許宗室營亦分隸左右翼八旗按愛辛覺羅氏  
爲有清國姓宗室俗呼黃帶子得國後之皇族也覺羅俗呼紅帶子開國前之皇族也迄  
今天命既改永列虞賓耶律完顏齊民同軌矣

滿洲

佟佳氏 遼東巨族也清初有佟養性佟養正居佟佳地因以爲氏後遷撫順以貿易貲雄  
一方清師克撫順佟養性輸欵携族屬來歸隸漢軍正藍旗後養正之孫國綱於康熙二  
十七年疏言臣曾蒙太祖諭令與佟佳氏之巴都哩蒙阿圖諸大臣考訂支派叙列族譜

今請歸入滿洲部議以佟佳氏官職甚多應隸漢軍惟國綱本支宜入滿洲遂爲正白旗人於是滿漢分隸族大支繁於清室八大姓中稱最焉留盛京駐防者滿洲至今傳十一世漢軍至今傳八世爲本屬望族

烏刺瓜爾佳氏 居烏刺國因以爲氏清初瑚爾哈器之妻與高后爲姊妹由是封爲國戚其孫錫特庫雍正三年襲六品官傳十五世

馬佳氏 世居嘉里庫馬佳地方因以爲氏清初赫東額率滿洲五十戶來歸隸鑲黃旗累著戰功授一等男其弟阿庫噶哈亦積功至男爵至十二世昇寅歷官工部尙書謚勤直傳十六世簪纓不絕爲邑望族

赫舍里氏 世居都英額地方清初碩色來歸隸滿洲正黃旗通漢蒙文其子索尼亦通滿漢蒙古文由頭等侍衛歷著戰功受世祖顧命爲輔政大臣授一等公謚文忠

喜他拉氏 世居喜他拉地方因以爲氏圖力吉都督爲興祖后之父阿古都督爲顯祖后之父至達格都督勅封國戚舅舅卽太祖之舅也清初隸正白旗滿洲世爲福陵章京品級至今傳十七世

富察氏 因地爲氏居長白山清初有瑚圖來歸隸正紅旗滿洲至今傳十四世

葉赫那拉氏 因地爲氏清初楊機柅之女諱孟吉姐姐卽高后勅封楊機柅之子阿什達爾漢爲國舅其後翁阿岱之孫爲國戚世守昭陵居城北至今傳十餘世

烏喇納拉氏 因國爲氏有滿泰者太祖納其女爲妃勅封國戚世守昭陵至今傳十餘世

哈達納喇氏 其先世居納喇河濱因以爲氏始祖納齊布柔爲滿洲名士隱居不仕子孫蕃衍散處葉赫輝發烏拉哈達四部清初後先率族來歸分隸各旗爲八姓之一太祖時

都琥禪者與弟雅克禪累積功至世襲佐領雅克禪之孫滿不康熙二十五年從征陝西滴水崖寶雞縣陽天池儀門鎮平涼等處累著戰功擊敗逆賊王輔臣之子王繼禎及偽總兵石遵禮黑邦俊楊天保徐宗炳之衆擢參領世襲雲騎尉數傳至廣祥少失怙母崔孺人有家教常語諸子曰汝祖以上皆武職三世爲將道家所忌盍少變計乎廣祥乃棄官隱於農救人之困濟人之急里中稱耆德弟得祥官盛京戶部郎中掌農田司印務持躬清介民間有以田產興訟者輒多方開導使之和解里人有金某者素健訟得祥於堂訊時嚴訓之金後卒爲善士會有某莊頭犯罪當死得祥承審得實將定讞適夜深口渴索茗部役以濃茶進飲之遂瘖不能語歸廐旋卒時論惜之今其曾玄皆有聲庠序間

鈕祜祿氏 初居長白山後散處英額地方清初有額宜都者識太祖爲真人佐命征討所向克捷賞賚衣馬弓矢甚衆並以其女爲太宗妃其子孫先後尙主者五人天命六年卒

封弘毅公配享太廟額宜都五配生子十七人世祖入關多隨扈從留奉駐防者隸鑲黃旗滿洲至今傳十餘世

伊爾根覺羅氏 氏族甚繁其居葉赫地方者清初來歸隸正黃旗滿洲世守昭陵先世世襲防禦後因事銷去今傳十餘世

梅勒氏 世居葉赫地方清初來歸隸正黃旗滿洲太宗攻松山杏山時有梅勒章京立功於大凌河賞世襲六品官至今傳十餘世

完顏氏 世居完顏地方本金太祖之裔清初來歸分隸各旗其留奉駐防者惟鑲藍旗滿洲一族爲最著五世楊保誥封昭武都尉七世佛爾果春由生員考授筆政升員外郎八世呈瑞字輯五庚子副貢今傳十餘世

覺羅察氏 先世有牙賴者爲昭陵噶拉大阿思哈哈番其子郗爾根爲內大臣太子太保

王世襲第二佐領牙賴弟牙拜仕至六品官至今傳十一世  
蒙古

伯爾吉及特氏 或譯博爾濟錦特本元太祖之裔清初來歸至阿爾沙蘭生有勇力人以  
獅子比之累積功授阿達哈哈番順治初入關擢侍衛與侍衛商熙並乞東歸奉太宗陵  
寢蒙特旨世襲頭等侍衛二等輕車都尉至今傳十餘世

莫爾吉及特氏 或譯莫爾濟錦特亦元裔世居莫爾吉及特地方因以爲氏清初來歸至  
商熙以戰功授頭等侍衛兼騎都尉雲騎尉世職順治初與阿爾沙蘭並東歸奉太宗陵  
寢子孫累世爲掌副關防今傳十餘世

巴禹特氏 元史作巴羽特或譯把岳歹清高宗時御定爲巴禹特世居蒙古巴林地方爲  
喀爾喀五部之一按陶宗儀輟耕錄蒙古人大姓七十二博爾吉錦特居首卽元皇族次



則巴禹特元史后妃傳巴禹特氏立后者凡二清天命二年內附以族巨分隸滿漢各旗  
惟屬正白旗者仍隸蒙古至今傳十餘世

奇莫特氏 蒙古鑲白旗人有觀保於順治十七年奉旨護送嗎哈嘎拉佛始移居盛京至  
今傳八世

漢軍

金氏 清初有金啟漢者仕明爲長山島參將會毛文龍爲袁崇煥所誅啟漢遂從孔有德  
率所部來歸授頭等輕車都尉世管廂紅旂漢軍佐領孫巴太隨征雲南累積功至協辦  
大學士至今傳十餘世

楊氏 清初明遼陽總兵楊滋榮來歸授佐領後陣亡賞加三等輕車都尉至今傳十三世

王氏 清初有王宣者仕明爲總兵界藩之役首先歸附至孫建基於順治五年因修陵寢

功授五品散秩官康熙九年改爲四品官世襲至今傳十四世

繆氏 世居瀋陽清初隸正白旗漢軍有禮山者字五峰官至河南布政四世德喜字立亭  
嘉慶庚辰科進士官吏部郎中前主講萃升書院至今傳十餘世

民籍

董氏 明永樂時有董士冕者由中山遷豐潤後移岫巖至孫氏楷始移居瀋陽至孫果字  
毅干以武進士累官至台灣總兵十世坦國學生精醫術十一世金聲字礪堂歲貢候選  
教職設帳四十年門弟子成名者甚衆至今傳十三世

周氏 其先浙江餘姚人清雍正十三年 佐幕吉林遂留居歷二世乾隆四年遷奉天

至名錦國學生廷璽乾隆己酉科拔貢歷任湖南湘陰縣知縣再傳濬由廩貢生歷任直  
隸衡水縣訓導若棠道光甲午乙未聯捷成進士歷任直隸順義縣知縣至今傳七世

王氏 清初時有王守義者先世爲順天人傳至三世之泰始遷瀋陽五世王沛字濟齋沛子朝幹字翰屏嘉慶戊午舉人盛京宗室學漢教習歷任山東三十餘載民建生祠奉之長子薰滋字仙李道光壬午舉人丙戌進士官儀部員外郎次樹滋字曉屏道光辛卯舉人癸巳進士翰林院庶吉士留館後告養回籍創修萃升書院次榮滋字小圃歲貢生候選訓導尋舉孝廉方正八世麟誥字雲史左右翼官學漢教習麟詔字丹臣附生亦漢教習麟綬字紫墀優貢生候補知縣麟紱字子朱歷任刑部主事河南同知九世葆琛字貢帆光緒乙亥舉人癸未進士歷官直隸州知州又祖焜官教諭元治字榆村光緒乙未科兄弟同榜舉人丁未進士歷官濟南府同知元相字梅村乙未科兄弟同榜舉人庚子進士歷官山東知縣至今傳十餘世

瀋陽縣志卷之十

古蹟

古山川

古城鎮

古衙署

古陵墓

古祠祀

古浮圖

古碑額

古橋梁

古驛站 附鋪遞

萬泉河

公園

瀋陽八景

古驛站 驛方正八角舖清字書史左右其官學教習舖清字并其舖自清漢就

古驛站 驛方正八角舖清字書史左右其官學教習舖清字并其舖自清漢就

古驛站 驛方正八角舖清字書史左右其官學教習舖清字并其舖自清漢就

古驛站 驛方正八角舖清字書史左右其官學教習舖清字并其舖自清漢就

古驛站 驛方正八角舖清字書史左右其官學教習舖清字并其舖自清漢就

瀋陽縣志卷之十

瀋陽縣志卷之十

古蹟

人事代閱陵谷變移載籍多略金珉永垂遼金行都漢唐置郡往迹博稽獻黎徵信  
敬恭桑梓憑弔謳吟今之視昔猶後視今興感盛衰冥搜遐討以永以存萬世瓌寶

述古蹟

古山川

東牟山 東牟山今名天柱山距縣治城東二十里清太祖福陵在焉按新舊唐書並云渤  
海大氏祚榮本粟末靺鞨保挹婁之故地據東牟山宋史高麗傳端拱四年二月遣秘書  
丞直史館陳靖自東牟山趨八角海口登舟遼史地理志渤海大氏始保挹婁之東牟山  
金史李勣破高麗粟末靺鞨保東牟山元一統志東牟山在瀋陽路挹婁故地明史及明

一統志並云東牟山在瀋陽衛城東二十里卽今天柱山也又按挹婁古亦作奧婁卽懿路在今縣治城北六十里省志云舊唐書作桂婁恐誤

隆業山 在縣城西北十里有清太宗昭陵順治十六年封曰隆業山陵前立仗石馬二曰大白小白開國時太宗御乘之馬也太宗軀體偉重乘大白日行五十里乘小白日行百里刻石陵前蓋仿唐昭陵石馬之制按太宗二后一諡孝端一諡孝莊惟孝端皇后合祔孝莊皇后留葬京畿馬蘭峪曰昭西陵奉安時告文有曰太宗之山陵已遠卑不動尊世祖之兆域非遙母宜從子當時推大手筆云

輝山 在縣城東北四十里明一統志云輝山層巒疊嶂爲諸山之冠山出石粉名白土可以代灰故又名灰山明代常置屯戍於此有石洞一山南山北古寺二北寺曰望雲明成化間隱士杜大釋夫婦捨宅所建碑誌猶存邑中八景輝山晴雪卽此

黃山 在今縣治城南三十里俗呼荒山清天命六年太祖征瀋陽明總兵陳策統四川步兵二萬營黃山鎧甲之外冒以棉帽棉被太祖以棉甲楯車擊敗之卽其處

九頂鐵叉山 在縣治城東南山上有洞名雲光洞舊志云相傳為仙靈窟宅康熙間三教堂郭守靜羽士嘗於是山修道時奉天大旱請其所禳起壇而雨

香爐山 在縣治城西四十里古蒲州之地

附

新羅山 通考新羅山西北界高麗百濟之間舊志新羅山南至奉天卽唐高麗界今無

考

帶方山 漢書樂浪郡有帶方縣通志三韓皆都帶方郡之東隋書遼西郡有帶方山禿

黎山鷄鳴山註卽奉天府界內地今不可考



潘水 在縣城南十里古亦名遼水又名小遼水卽今渾河也前漢書地理志桑欽水經並云高句麗遼山遼水所出西南至遼隊入大遼水漢書注小遼水西南至遼陽入大遼水水經注晉書並同遼史地理志瀋州渾河在東梁范河之間金史地理志瀋州樂郊縣有渾河元一統志渾河在瀋陽路源出貴德州東北西南經瀋州南十五里舊稱瀋水水勢湍激沙土混流故名渾河今水澄澈遇漲則渾明一統志渾河源出塞外西南流至瀋陽衛合沙河入大遼水注於海清天命六年三月畧瀋陽舟順渾河而下敗明將陳策張名世童仲貴張大斗之軍克其城今按渾河卽瀋水歷代官書如元一統志已詳載之蓋所以著瀋陽路移治之始也舊志各書於小瀋水下注云在城南四里俗名五里河自城東南觀音閣萬泉河發源並引春秋穀梁傳水北曰陽謂瀋陽之名以此而於元志舊稱之瀋水反無其名是直以小瀋水爲瀋水矣殊不知瀋水卽古遼水今爲渾河已早見於圖

經爲遼東流域之最著者嘗考古帝王建都置邑必擇氣脉雄長水土深厚之處首重設險流惡未有捨名山大川而據一衣帶水爲天塹者小瀋水源流不過萬泉沮洳不能五里非有流域可言徒以南入瀋水合流遂以小瀋水名之耳其在當時雖以渤海沃沮局跡猶且不屑而謂神皋奧區之天府陪都乃以此得名乎觀於此舊志之誤不待辨而自明矣迄今志書闕修又百餘年傳疑愈久訛世愈深使後來邦人寓公幾無復有知瀋水流域所在者以致方輿日晦水道日堙元代以上之瀋州乃與今之瀋陽不別而古時渤海遼金以來疆域之建置沿革遂蕩然不可考矣夾漈鄭氏有言地理以水爲主瀋水不存瀋陽安屬茲特表而出之以著瀋陽得名之自非瀋水之外別有小瀋水也爰志於此備職方輶採並以俟輿地家之攷鏡云其小瀋水卽今五里河別詳見地理中

按瀋水故道本在今縣治城北自清天命間築城時始引之南流其流域所經今不可考

稠柳河 在縣城南六十里卽今十里河

沱河 遼史地理志貴德州寧遠軍有沱河

范河 遼史地理志挹婁縣有范河金史瀋州昭德軍有范河

奧婁河 新唐書萬歲通天中渤海大祚榮阻奧婁河樹壁自固通志承德縣有奧婁河注

奧婁卽挹婁按滿洲源流考以奧婁河爲阿魯河源出吉林似誤

### 古城鎮

瀋州古城 舊志云今縣治城東南二十里有古城周圍二里零二百步東西二門又王氏

志修奉天地輿圖表承德縣圖古城在渾河流域左岸其北爲天柱山按唐書渤海大氏

始置瀋州歷代地志皆未言在今縣治何地若今縣城則清天聰五年修築本因遼金瀋

州元瀋陽路明瀋陽衛故址增拓非渤海時瀋州之舊地遼史地理志云唐高宗平高麗

置安東都護府後爲渤海大氏所有始保挹婁之東牟山武后時爲契丹所逼有乞乞仲象者度遼水自固傳子祚榮建都邑自稱震王併吞海北之地中宗賜所都名曰忽汗州封渤海郡王爲遼東盛國忽汗州卽故平壤城唐時之安東督護府也遼東行部志云瀋州在唐時常爲高麗侵據高宗命李勣東征置安東都護府於平壤城與朝鮮平壤同名實今之瀋州也唐季爲大氏所有號中京顯德府遼滅渤海置瀋州顯德軍別築城曰天福以處東丹人皇已非渤海之舊至元明又移城治於瀋水之陽改名瀋陽而渤海之瀋州故基遂不可考按新舊唐書並云渤海大祚榮保挹婁之故地據東牟山築城居之又按渤海建國世系大氏始保東牟仲象遂度遼水傳至祚榮乃建都邑乞乞仲象所渡之遼水卽小遼水今爲渾河挹婁卽今懿路東牟山卽今天柱山有清太祖福陵古城在其正南北與天柱山相對枕山帶河憑扼險阻爲當時兵家重地與唐書遼史各地志悉合

疑卽渤海最初之瀋州故址爲大氏祚榮所築者姑誌於此以備考訂

今渾河卽古遼水亦名小遼水詳見

前漢書及水經注

附考

按自唐睿宗以渤海大祚榮領忽汗州都督其後因襲爲號凡五京皆有忽汗

州之稱然據東牟挹婁則瀋州爲渤海中京實卽中宗賜號之地史特不能詳耳滿洲源流考謂大祚榮所都在長白山又謂平壤城在朝鮮境其說恐未徵信夫鄭公使北虜伴故迂其途元菟迤東吳書遂營其地况當時聲教不通言文互異郢書燕說展轉沿訛正未可疑以傳疑致多滋惑今以新舊唐書及遼史爲斷以東牟挹婁爲定渤海旣明則瀋州故跡瞭然矣

樂郊縣 遼史太祖移三河之民至此建三河縣後更名樂郊爲瀋州治金時瀋州統樂郊

縣舊志云在今城東北隅明時爲軍營按宋稗史及御寨行程錄樂郊縣有樂郊館金人

五以二帝北去至瀋州館之樂郊館卽樂郊驛也今縣城東隅有徽宗寺祀宋道君俗謂徽宗家廟疑卽當時樂郊館之故址又縣署舊有綽楔榜署樂郊二字今佚

北豐城魏略後漢至公孫度據遼東築豐城司馬懿伐遼東豐人南徙青齊其留者曰北豐舊志云在縣城西北今圯無存

虎皮驛古城在縣城南六十里周圍一里二百三十步南一門明熊廷弼經略遼東設防於是控扼遼瀋清天命六年征遼陽進師虎皮驛撫降之後改修南北二門卽今十里

河

唐代古城一有二十一在縣城東南隅未里塔山上其城周圍二里半東南一門塔女一在縣

城東南六十里歪頭山上有城周圍一百九十五步東南一門相傳並唐征高麗時留軍

屯戍之所

集州古城 在縣城東南四十五里渤海置集州領奉集縣遼史地理志集州懷衆軍古陣

離郡地金史地理志併州入縣改屬貴德州元時廢明置奉集堡亦作鳳集堡置鐵場百

戶所明一統志在撫順千戶所南八十里有土城周圍四里正南一門有橋名鳳集堡橋

清天命六年二月略明奉集堡三月降之

撫西古城 在縣城東南八十里舊名撫順城明洪武二十一年設千戶所亦曰撫順關其

城周圍一里七百三十六步池深一丈闊二丈門二後改爲鎮城重修周三里東南北三

門明萬歷十六年清太祖始於撫順清河綏陽寬甸四關口互市天命三年四月以七大

恨告天征明圍撫順降明守將李永芳毀其城康熙二十九年復置城守乾隆四十三年

重修

今改設撫順縣

武靖營城 在縣城西南五十里周圍一里一百五十步南一門東即虎皮驛明時設兵防

守清天命六年太宗破明將朱萬良於此

章義古城 在城西南七十里有二舊城周圍四里共四門遼時築置廣州治昌義縣金改章義別築城周二里一百七十二步東南二門金史地理志章義縣遼舊廣州昌義縣屬瀋州元廢明爲章義站松漠紀聞距瀋州六十明一統志同清天命六年撫降之今名爲彰義站猶有邊城舊趾

得勝營古城 在縣城西南五十里周圍一里明時築爲屯戍之所卽今得勝營

沙嶺古城 在縣城西四十里周一里半東南二門卽明沙嶺墩故址卽今沙嶺堡

靜遠古城 在縣城西六十里周圍半里南一門明時築清天命辛酉撫降之卽今淨烟堡

蒲州古城 在縣城北四十里渤海置松漠紀聞興州四十里至蒲河四十里至瀋州元一

統志蒲河在瀋陽路源出鐵利國蒲谷流經蒲水田區故名新唐書鐵利故地爲鐵利府



領蒲海六州遼初廢以洪皓所記考之距瀋州四十里其地有香爐山爲蒲河之源明  
千戶所於此城周圍七百二十五丈池深一丈闊二丈門二舊志云乃遼東十八城之一  
挹婁古城 在縣城北六十里周圍三里十五步南北二門本金挹婁縣故址明時訛爲懿  
路後漢書三國志晉書並云挹婁古肅慎之國舊志云隋時亦爲粵喜國地通考挹婁故  
地渤海爲定理府領定瀋二州遼金元三史地理志並云瀋州本挹婁故地明永樂五年  
修築置左中二千戶所於此清天命五年八月太祖征明由挹婁蒲河進兵卽此城圯今  
爲站

附

崇信故縣 舊志云在今縣城東南本漢長岑縣地渤海置州領崇山爲水綠城三縣遼  
置崇州隆安軍統崇信縣又靈源縣渤海時置同屬瀋陽界內故址皆無可考

石城 在縣城東南七十里石城山上有古石城周四里門一相傳卽高麗白崖城唐

太宗拔之置巖州於此金史地理志以縣之靈岩寺爲岩州遼史地理岩州石城縣本渤海白岩城按石城遼時隸於瀋州金已改屬今附卷末用存古蹟

高麗古城 在縣城東七十五里有古城周圍四里東西二門相傳爲高麗所築今圯  
將臺 在地載關外爲前清時點兵之地

九門 在福勝地載二關之間相傳清初入關定鼎後此門始閉

古衙署

元 安撫高麗軍民總管府 在城內東南隅元史地理志初平遼東高麗國麟州神騎都

鎮洪福源率西京都護龜州四十餘城來降各立鎮守司設官以撫其民後高麗復叛洪

福源引衆來歸授高麗軍民萬戶徙降民散居遼陽瀋州初創城郭置司存僑治遼陽故

城中統二年改爲安撫高麗軍民總管府及高麗舉國內附又以質子淳爲安撫高麗軍民總管分領二千餘戶理瀋陽元貞二年併兩司爲安撫高麗軍民總管府仍治遼陽故城又瀋陽等處千戶所元至治元年置舊址無考

明 瀋陽中衛署在奉天城內明洪武二十年置今廢又撫順千戶所在撫西城蒲河千戶所在蒲河城並明洪武中置俱廢

按瀋州之有官署莫先於唐設之安東都護府舊書地理志總章元年李勣平高麗初置安東都護府於平壤城聖歷元年更名都督府新書唐平高麗置都督府九州四十二縣百置安東都護府以統之按遼東行部治平壤城即今瀋州與朝鮮平壤同名但唐之瀋州區域廣漠不止今一縣之地自渤海立國元代徙民城邑屢移已非唐舊安東都護府治久不可攷矣

清 盛京將軍衙署 在德勝門內今改財政廳

奉天府府尹衙署 在德勝門內今改商務總會

盛京戶部衙署 在德勝門內今改財政廳

盛京禮部衙署 在德勝門內今改女工傳習所

盛京兵部衙署 在天祐門內今改屯墾局

盛京刑部衙署 在天祐門內今改圖書館

盛京工部衙署 在德勝門內今改女工傳習所

盛京府丞兼學政衙署 在懷遠門內今改瀋陽縣公署

奉天驛巡道衙署 在天祐門內今改交涉署

奉天治中衙署 在撫近門外今改警察廳

盛京承德縣衙署 在懷遠門內今改政治研究所

盛京典史衙署 在懷遠門內今改修瀋陽監獄

盛京教授衙署 在德勝門內今改本縣勸學所

三陵六邊衙署 在撫近門外今改文工藝研究所

戶部官莊衙門 在德勝門內今改修清丈局

驛站衙門 在天祐門外今廢

古陵墓

清成親王岳託墓 在縣城南五里南塔之東按清成親王有二此為開國時之成親王乃

克勤郡王乾嘉後始追封親王諡曰成者也一為純廟十一子永瑛封成親王工書為諸

清王第一有詒晉齋法書墨刻詩集行世

饒餘郡王母妃墓 在縣城北二台子

揚古利墓 在縣城北十里清封忠勇王

達海墓 在縣城東南五里清內閣大學士諡文成太祖時奉勅創製國書

額宜都墓 在縣城東十五里清封弘毅公

費英東墓 在縣城北五里清封直義公

圖爾格墓 在縣城東十五里清封忠義公

宜爾登墓 在縣城東北毛君屯清二等伯內大臣諡忠直

明安墓 在縣城北五里清二等伯諡忠順

宜孫墓 在縣城北五里清兵部尚書諡襄壯

覺羅塞勒墓 在縣城西五里清內大臣諡勤愨

超合羅墓 在縣城東十五里清侍郎諡果壯

涂魯希墓 在縣城北五里柳條湖清噶喇昂邦諡忠宣

博爾津墓 在縣城西南十里清都統諡忠宣

冷格里墓 在縣城北十里瓦子窰清都統諡武襄

安邊我墓 在縣城西十里攬軍屯清都統諡敏壯

何和禮墓 在縣城南六十里清都統諡溫順

何碩圖墓 在縣城南五十里何和禮子都統三策公諡端愨

文祥墓 在縣城東半里清軍機大臣文華殿大學士贈太傅諡文忠

阿穆爾圖墓 在縣城東五里清奉天將軍諡襄壯

車克墓 在縣城東喇古峪清翰林秘書院大學士諡文端

納爾臣墓 在縣城北十里瓦子窰清副都統謚端壯

鄂莫克圖墓 在縣城西十五里清副都統謚壯勤

阿爾沙蘭墓 在縣城西北二十五里清頭等侍衛特賜立碑

格德里墓 在縣城北四十里清三等精奇尼哈番謚端順

舒賽墓 在縣城西十五里清三等阿里哈哈番謚壯勤

達諸護墓 在縣城北十里二台子清三等阿里哈哈番謚襄敏

雅希禪墓 在縣城東北曾家屯清一等阿達哈哈番謚敏果

西喇把墓 在天祐關關外清三等阿達哈哈番謚順壯

安達禮墓 在縣城西北十里清二等阿達哈哈謚忠介

敦達禮墓 在縣城西北十里清二等阿達哈哈謚忠果



衛奇墓 在縣城北十里清三等阿達哈哈盛京八門總管謚端勤

雙烈墓 在縣城南六十里十里河清驛丞袁某之二女父欲以非禮字人二女不從同日死里人哀之爲立墳號雙烈墓

蘇伯公墳 在縣城西沙河子有清順治年碑文字殘缺不可考

附

白駝墳 在縣城西五里清初元裔察哈爾林丹汗來歸以白駝載嗎哈噶喇佛金像並

金字藏經及元代傳國璽至盛京建佛經樓璽入內府白駝後斃遂築墳於此猶唐明

皇登封之白驪墳故事按清太宗實錄天聰九年八月庚辰出師和碩墨爾根戴清貝

勒多爾袞貝勒岳託薩哈廉豪格等征察哈爾國獲歷代傳國玉璽先是相傳茲璽藏

於元朝大內至順帝爲明洪武帝所敗遂棄都城攜璽逃至沙漠後崩於應昌府璽遂

遺失越二百餘年有牧羊於山岡下者見一羊三日不嚙草但以蹄跑地牧者發之此  
璽乃見既而歸於元後裔博碩克圖罕後博碩克圖罕爲察哈爾林丹罕所侵國破璽  
復歸於林丹罕亦元裔也貝勒多爾袞等聞璽在蘇泰太后福金所索之既得視其文  
乃漢篆制誥之寶四字璠瑜爲質交龍爲紐光氣煥爛洵至寶也多爾袞等喜甚曰皇  
上洪福非常天錫至寶此一統萬年之瑞也因具書以聞癸未文館甲喇章京鮑承先  
奏言皇上聖德如天仁政旁達苞符協應大寶呈祥天賜玉璽乃非常之吉兆也當勅  
工部製造寶函諷擇吉日躬率諸臣郊迎由南門入宮以膺天眷而昭符瑞仍以得璽  
之由書於勅諭鈐用此寶頒行滿漢蒙古俾遠近聞知咸識天命之攸歸也上從之敬  
識得璽之由垂示萬世永永無極云見通志

古祠記

天壇 在德盛關外南五里建

園丘舊制三成每層圓面遞加環砌上成九重周圓一丈八尺二成七重周圓三丈六尺三成五重周圓五丈四尺俱高三尺圍牆週一百十三丈南一門東西北門各一第一成恭祀

昊天上帝位南嚮列聖位東西嚮第二成以大明夜明星辰雲雨風雷從祀位各東西嚮崇德元年夏四月太宗以得元傳國璽上尊號躬親肇祀十一月討朝鮮復祀天於園丘告興師致討之由順治後移都燕京此壇遂廢

地壇 在內治關外東三里建

方澤舊制二成四週以方坎蓄水每層方面遞加墁砌上成建方六丈高二尺下城建方八丈高二尺四寸圍牆週一百三十三丈八尺北一門南東西門各一第一成恭祀

皇地祇位北嚮列聖東西嚮第二成以五嶽五鎮四瀆列祖山陵配祀位東西嚮乾隆時重修

社稷壇 在天祐門外雍正十一年建

風雲雷雨山川壇 在社稷壇前雍正十一年知縣蔡玉升建

先農壇 在德盛關外雍正五年建

厲壇 在地載關外

都城隍廟 在縣城內四平街舊瀋陽城隍廟也按城隍之祀始於南北朝唐後因之今廟內有元至正及明洪武弘治萬歷年重修碑記

景祐宮 舊在城內大清門東後移建德勝門內明時創建有萬歷丙戌年重修碑記詳見

宗教

堂子廟 俗呼鄧大人廟爲清初祀天神之所內藏太祖所御服履並拊祀明故總兵鄧子

龍

江西南昌人萬曆中官副總兵

按嘯亭雜錄天咫偶聞並云鄧子龍與太祖有舊太祖常微服覘明境

爲邏卒所執子龍陰送出境開國後遂拊祀於堂子非若俗傳之傳會也又滿洲舊俗每

祭神輒祀萬歷媽媽卽明萬歷李太后也太祖初起兵甚微時明廷欲以全力撲滅之賴

萬歷后一言得免後遂成大業亦見嘯亭雜錄與鄧子龍事相類又同爲曼殊故實故附

錄之

實勝寺

在外攘關外三里清太宗破明兵於松山師還勅建寺供邁達里佛內藏清太祖

太宗御用甲冑弓矢乾隆時高宗東巡者四每至就瞻遺澤皆有詩記之餘詳宗教中

大法寺

在縣城福勝關爲清英親王之家祠寺前有井俗名八王寺井清冽甘芳爲邑泉

冠康乾東巡率以明駝載運京師玉泉水日久沈澱必以此井水洗之合注兩水於甕刻

痕以記用竹竿攪之如撈水法少時則玉泉水浮於上澄清如故以銀杓平挹取之至刻痕而止甕半以下則爲寺前井泉不復進御矣寺中名勝甚夥甲辰日俄之戰燬於兵燹古蹟蕩然

御花園 在縣城西北五里清初供御之花園也順治十三年勅改爲長寧寺有乾隆十九年御書一心爲正榜額祥見宗教

忠義孝悌祠 在德盛門外雍正九年建

節孝祠 在懷遠門外雍正九年建

賢王祠 在外攘門外初名怡賢王祠雍正十二年建乾隆間特奉旨以通達郡王武功郡

王慧哲郡王宣猷郡王禮烈親王饒餘郡王鄭猷郡王穎異郡王睿忠親王豫宣親王克勤郡王俱祀祠中

僧王祠 在外攘關外

三賢祠 在外攘關外祀清文文忠公祥都清愨公興阿崇文勤公實

雙忠祠 在外攘關外祀清左忠壯公寶貴永壯愨公山

依公祠 在外攘關外祀清盛京將軍依誠勇公克唐阿

東嶽廟 在內治關俗呼天齊廟爲漢武帝時建今碑記猶存邑中僧刹此爲最古廟內有

地藏閣相傳下卽地獄故以地藏鎮之其說不經或云乃古隧道

渾河神廟 在城東十里木廠乾隆四十三年勅建有御書靈脈精誣匾額

漢關壯武廟 在地載關外建立年代無考相傳云創於元明築城之前白描捏素與他廟

赤面者不同今呼白臉關帝廟考晉地靈石有白臉將軍廟但非祀壯繆耳又關廟名稱

之異者燕京有姚斌關帝廟乃元劉供奉手塑與此並爲異跡

準提閣 在縣城外攘關今爲斗姆宮清康熙四十三年皇三子允祉以祝嘏改建殿中準提佛像猶明代所塑者

精忠廟 在縣城內治關明代建本祀宋岳忠武王後以伶人釀金重修故增祀唐明皇遂改名老郎廟

長安寺 在縣城內舊志云古刹也後重修時掘地獲一石頗奇古相傳爲宋良嶽故物金時載以北來者

地藏寺 在縣城南六十里三塊石山係清順治八年建石碑一猶存

興隆寺 在縣城南二十里珠山一名龍華山舊有寺不知何代所建清乾隆四十五年重修時刻石立碑二

古浮圖



崇壽寺塔

在縣城地載關亦名白塔唐時建明神宗時重修碑記稱此塔唐尉遲恭監造

舍利寺塔

在縣城西十二里塔灣舍利寺前清崇德二年勅工部重修賜名回龍寺邑中

八景塔灣夕照卽以此塔得名相傳唐時建

白塔

在縣城南二十里白塔舖明永樂四年僧德本監修清天命六年三月太宗破明

三總兵之軍於此其塔初不知何代建玲瓏高聳如以白石琢成者建築之工爲邑中古

浮圖冠咸豐十年八月初七日鄉劉作肅太守任廣西太平府時值悍賊吳凌雲犯順城

破一門殉難其日村中大風霾吹白塔頂墮有聲如雷霆鄉人驚集趨視見其銘字始知

明代遺構未幾邸報太守於是日靖節浴鐘之應人以爲太守閣門忠義所感理或然歟

洎光緒甲辰日俄之戰塔爲礮火所燬村落旋亦彫敝劉太守字敬亭詳見人物中

附郭四塔

縣城附郭東西朔南各有浮圖一華蓋高標相輪層覆蓮披岳聳如鐘鼎文自

字形舊志云清初用喇嘛相地術隨方建白塔四云能一統又北塔舊有佛車一乘相傳  
爲古法物每屆跳健則以此車接佛餘見宗教

古碑額

石經幢 在城內東華門外文德坊上刻金剛經俗呼石面亭諺云見石面卽此承德志云  
相傳爲鎮海眼而設奉天古跡考云大政殿前有小亭供一斷石俗稱十面石十面均刊

佛號隱約猶辨大唐字樣當是唐時寺塔殘石也

按直隸保定府城蓮池書院有六幢亭內植石幢皆刻梵文悉遼金故物也制

作與此同

東嶽廟漢碑

在撫近關堂子廟內原漢東嶽廟故址漢武帝時所立碑石猶在

都城隍廟古碑

在城內都城隍廟本元代城隍廟故址有元至正年碑及明洪武弘治萬

歷年重修碑記

景祐宮古碑額

在德勝門內係明萬歷丙戌年重修建又清康熙二十一年御書賜額昭

格二字乾隆四十三年御書賜額玉虛真宰四字

二陵神碑

一在城東福陵一城北昭陵碑陰均隱約作人形俗呼神碑奉天古蹟考云俗

稱美人石亦稱觀音石

虎皮驛石額

在城南十里河明萬歷間立

關廟御題額

在地載關外乾隆十九年御書靈護神京四字橫匾

太清宮古碑額

在外攘關外碑石甚多最著者有清內閣學士駐藏使者尙賢所書重建

玉皇樓碑陰記匾額有清雍正九年平郡王福彭書大道同源四字橫額衍聖公孔令貽

書後天不老四字橫額學政張英麟書威震華夏四字橫額副都統成殿鰲書圓覺通靈

四字橫額東西樓有原任將軍完顏文勤公崇實書九天上相萬古長春匾額楹聯則有

陳慶雲軍門所書煮白石飯讀黃庭經歎署鐵床道人相傳謹成時留題又玉皇樓老君  
殿關帝殿聯語均清內閣學士尙賢書樓西北隅郭祖塔致虛守靜四字橫額爲康熙間  
大興李錦書

斗姆宮題額 在外攘關本明準提閣故址古碑失考今有清康熙間皇三子允祉書天人  
祝聖四字橫額光緒間奉天府尹興陞書大智寶光四字橫額

清虛觀清碑 在風雨台有清乾隆五十六年重修碑記匾額有學政張英麟書大光明殿  
四字橫額奉軍翼長左寶貴等立恩覃三界四字橫額

南極宮古碑 在德盛關原名靜業菴有古碑二座字跡模糊不辨何代匾額有乾隆庚午  
年立三天極樂四字橫額

真武廟題額 在外攘關有清乾隆丙申年立萬壽宮三字橫額

永安寺唐碑 在奉集堡有古碑二座係唐太宗征高麗時命尉遲恭建修

孫祖廟題額 在內治關有清乾隆四年重修時題額

山神廟清碑 在內治關有清乾隆六十年嘉慶二十五年重修碑二座

永寧庵清碑 在內治關有清康熙十八年重修碑

養生堂清碑 在內治關有清光緒三年重修碑

竈君廟題額 在內治關有清乾隆六十年重修慈航普渡鐵匾一方

崇壽寺古碑 在地載關有唐敬德監修二次殘碑明萬歷四十五年重修碑清道光年重

### 修匾一方

瘟神廟清碑 在地載關有清乾隆嘉慶同治年重修碑

白衣寺清碑 在福勝關有清道光年重修碑

應福寺古碑 在福勝關昔茶棚庵也後經清奉天學政鄭施資重建爲叢葬義地

萬壽寺清碑 在外攘關有清康熙六十年勅建碑又五十八年賜御書遼海慈雲四字一

軸又御書慈意妙雲四字橫額寺內尊藏明正統五年御賜藏經一藏清雍正十三年御

賜藏經一藏

賢王祠清碑 在外攘關有清乾隆十九年建立碑

地藏庵清碑 在外攘關有清順治十八年康熙六年四十二年道光二十四年重修碑

永壽寺清碑 在外攘關有清康熙十二年建立碑二座

關帝廟清碑 在外攘關外有清雍正四年乾隆元年嘉慶二十二年咸豐元年同治五年

重修碑

保安寺清碑 在懷遠門外清康熙六年建立塔碑各一座十八年鑄千斤大銅鐘一口六

尺古銅佛像一尊

普慶寺古碑

在外攘關清初淞江大願老人施茶於此名茶棚庵後光祿大夫嗎哈噠重

修有古碑一座又嘉慶三年重修碑一座

保靈寺清碑

在外攘關外昔為僧侶施茶之地亦名茶棚庵有清康熙六十一年乾隆十

二年重修碑

老君堂古碑

在內治門有古碑字跡模糊不可考

老郎廟古磬

在內治門有明崇禎九年鑄鐵磬一口

太法寺碑

在福勝關有清乾隆五十四年重修碑

北萬壽寺碑

在天祐關有清乾隆五十七年重修碑

大悲庵碑

在撫近關有清道光二十二年重修匾額二方咸豐元年重修碑

吉祥庵題額

在撫近關有清雍正乙卯乾隆五十七年道光三年重修匾額

寶覺寺古碑

在撫近關有明萬歷清康熙丙午乾隆五十七年重修碑

青雲寺題額

在撫近關有清康熙二十三年嘉慶六年道光二十七年重修匾額

華嚴寺清碑

在德勝關有清康熙八年重修碑

鎮寧寺清碑

在德勝關有清順治五年重修碑

慈恩寺古碑

在德勝關有明代殘碑

大佛寺題額

在德勝關有清乾隆十二年重修匾額又寺內有丈六銅佛一尊

般若寺清碑

在德勝關有清初古林智禪師創建時所立碑

長安寺古碑

在城內鐘樓北有明成化二十三年重修碑清順治二年乾隆三年道光二

十年重修碑



龍王廟碑額 在撫近門內有清道光二十五年重修碑前盛京將軍完顏文勤公崇實崇

厚兄弟匾額殿內供奉香木雕貼金龍一相傳為前代乾隆年自京謫譴來者

地藏寺清碑 在天祐關有清康熙五年嘉慶三年重修碑

普濟寺清碑 在天祐關有清順治六年重修碑嘉慶十七年重修匾額

永寧寺清碑 在懷遠關有清康熙九年道光二十二年重修碑又道光七年重修匾額

杏林書院清碑 在懷遠關有清乾隆十九年重修碑

望雲寺清碑 在懷遠關有清乾隆二十年重修碑

蓮宗寺題額 在懷遠關有清道光十七年重修匾額

大興寺清碑 在福勝關有清乾隆十九年重修碑

魁星樓碑 在撫近關有清道光十八年重修碑

實勝寺碑額 在外攘門外有清天聰九年敕建四體碑御書海月常輝四字橫額又長寧

寺有康熙御書川淨波澄四字橫額乾隆御書一心爲宗四字橫額又永光寺御書慈育

羣靈四字橫額又廣慈寺御書心空彼岸四字橫額又延壽寺御書金粟祥光四字橫額

又法輪寺御書金鏡周圍四字橫額並乾隆八年御賜

聖清宮清碑 在外攘門內甘石橋有清同治十一年重修碑

### 古橋梁

渡仙橋 在外攘關角樓西相傳昔有酒家設肆於此至夕輒有一老人貰酒貌奇古飲甚

豪罄百爵無醉容酒家奇之嘗終歲不責負而甕中酒輒自溢不遑巡愁沾也由是沾客

坐常滿利數倍心異之一夕老父至索飲大醉去尾之至橋而隱從此不復見遂名曰渡

### 仙橋

七星橋 在縣城外東北角樓下東西與渡仙橋相對不知何代所建光緒三十一年重修

距橋西七步許有石碑日午視之石上幻形彷彿作苾雛膜立狀俗呼七步和尚碑

附

渾河橋 在城南十里渾河係甲辰戰爭時俄人建修橋長二里許柱深五六丈純用木材建築上敷鐵軌車行其上有洛水橋長晝起雷之勢戰後爲日人所有名爲大宣橋

嗣由地方以鉅款收回路權所在亦形勝然也宣統季年橋漸圯時蒙古錫良督奉天漢軍金正元攝縣篆經邑紳內閣學士尙賢函請修補行人便之終以木質易朽每歲水解春汎猖狂蝕嚙日久橋遂中斷刹那之間已成古迹惜哉釋氏之喻世界成住空壞譬如一水二十年後有人造橋又二十年橋成渡人又二十年所造橋壞又二十年無復有水信夫

古驛站

瀋陽縣西至山海關站道

第一站在城

凡奉天各路站道皆從此起

六十里至老邊站四十里至巨流

河站七十里至白旗堡站五十里至二道井站五十里至小黑山站七十里至廣寧站八十

里至十三山站五十四里至小凌河站五十四里至高橋站六十二里至寧遠站六十二里

至東關站六十三里至凉水河站七十五里至山海關

以上共十三站

瀋陽縣東至興京站道

七十里至噶布拉村站七十里至沙爾湖站八十里至穆奇站四

十里至興京

瀋陽縣南至朝鮮站道

六十里至十里河站七十里至迎水寺站七十里至浪子山站五

十里至甜水站四十里至連山關站五十里至通遠堡站六十里至雪裏站四十里至鳳凰

城站

瀋陽縣東北至烏喇寧古塔站道 七十里至懿路站七十里至高麗屯站七十五里至開

原站

瀋陽縣北至法庫門站道 七十里至嚴千戶屯站六十里至法庫站

以上共十六站

附古舖遞

瀋陽縣舖兵十二名

西路在城舖一名三十里大石橋舖二名三十里老邊舖二名三十里孤家子舖一名西

與廣寧縣巨流河舖接北路在城舖一名三十里蒲河舖二名北與鐵嶺縣懿路舖接南

路在城舖一名三十里火石橋舖二名三十里十里河舖與遼陽州各設一名

萬泉河

萬泉河 在邑城撫近關之東源出觀音閣之湧泉西流入東水柵至魁星樓過虹橋折而南注踰南水柵與二道河會俗呼小河沿卽小瀋水也清波一泓珠泉萬孔而四時不涸故又名萬泉河河之上流水草叢生荷花最盛本瀋陽八景之一爲夏日游人避暑地舊時旗亭賣漿者惟沿岸設蓆棚土銚烹茶旨詞進曲供倦游駐足而已光緒丙午始有沈姓者經營華路點綴林泉其營業分兩部司建築者曰大豫公司司租賃者曰地皮公司先後修築舞台市場水榭四十餘楹畫舫容與湖山生色儼有歐美公園之風翌年爲直隸天水氏所得增構菟裘頓成金地長沙太守榜其園亭曰鷗波館蓋仿魏國故事也初亭榭建築多在南岸至是復增建津橋四以利交通行人便之每當炎官施令之際火織高張涼台乍啓游人麇集商販鶩趨香塵與龍鷁齊飛人面共芙蓉一色昔時邱壑游釣

之鄉遂一變而爲綺羅管絃之藪雖秦淮胭脂水西湖銷金鍋殆無以過之其河之北岸連雲累棟皆爲外人居留地教會醫院在焉嗟乎臥榻鼯睡熱鐵難翻脉脉伊川被髮久矣豈謂返趙璧於玉斧補媧石於金甌是則天水氏之力居多正不得以其人少之民國二年復由趙氏轉入東三省官銀號管理迄今遂爲官有云

### 公園

奉天公園 在縣治外攘關外係前清光緒三十三年東三省總督徐世昌就原有官地興辦東至京奉新站西至實勝寺南至商埠北至依公祠積善寺一帶其所占界址都三千五百四十七方丈園之外圍繚以短牆中浚方池闢門凡四隨方各築小亭一春夏之交游人頗盛趁集踏青者無虛日入園之東門有小亭是爲雪亭雜花蓋地芳草如茵西爲鹿圈蓄馬鹿牝牡各一呦呦有食苹之意至園中行而南折有小池中蓄魚數百尾池上

有亭曰澄心涉級一登則商埠塵市如在目前南滿停車場磁輪來往歷歷可數其北則攬轡亭翼然峙焉地據一園之勝擷芳會極全景皆收亭有徐督手書楹聯云地居歐亞之衝問當代名豪幾人經過亭外山川如繪考巖疆形勝注我懷來胸襟豪闊吐屬不凡園中所藝植物木類有馬尾松龍鬚柳烟柳白楊柳榆楓槐德國槐楸梓卡青大葉桑李梨玫瑰紅老鸛眼爲株二千一百六十有五草類有蒲菱蕉荻桔梗防風翠雀牽牛鳳仙草芙蓉洋菊江西臘薄荷梅雞冠蝴蝶金錢梅菊葵蓼草茉莉錦松粉串珠蓮牛蒡金盞浮水蓮爲畦二十有四出園之西門外有亭名衆歡傍實勝寺綽楔爲界東西與萬泉河相對亦夏日避暑一佳境也初經始時曾設總辦綜理一切嗣因經費支絀歸併於勸業道署旋改由植物公所經理嗣又改屬農業試驗場民國四年奉按使公署飭令撥屬女子蠶業學校今改歸第五小學校管理現設經理一技手一夫役三常年經費由財政廳



發給額支五百六十四元

瀋陽八景

天柱排青

在城東二十里

輝山晴雪

在城東北四十里

渾河晚渡

在城南十里

塔灣夕照

在城西十二里

柳塘避暑

在城南五里

花泊觀蓮

在城北十里

萬泉垂釣

在撫近門外

黃寺鳴鐘

在外攘關外

按陪京雜述所紀瀋陽八景如此又奉天古蹟攷云舊傳十景已無攷今傳八景一日鳳樓

曉日登鳳凰樓而一覽瞳瞳曉日烟火萬家二日星閣晴霞奎星閣高峙城東夕照晚霞

一望千里三日北陵紅葉北陵多楓柳西風黃葉紅滿秋林四日天柱神松東陵天柱山

萬松夾道歲寒不凋五日四平燈市城內四平街上元放燈春城不夜六日萬泉蓮舟萬

泉河荷花滿沼畫舫如織採蓮而歌七曰西園晚眺公園在西邊門外夏夜納涼遊客羣  
集八曰東塔春耕東塔農業試驗場綠野春畊別饒風景茲並錄之以備參考

...

...

...

...

...

...

...

...

...

...